

水心集

冊五



水心文集卷之十八

墓誌銘

陳秀伯墓誌銘

平陽豪士陳君堯英字秀伯少有大志一時貴人非其黨所致雖其能所致而終不足以立視之皆如無也紹興六年上書登聞陳第十二明年正月再上請朝政序序亦十二語益切三日復上兵書指畫利害尤急高宗異之令政事堂召問君既不以求和爲是而書語侵中書執政固不喜至召問君長揖色倨論事泉湧不屈執政愈怒奏罷之君不悔也將歸又以三書抵宰相曰苟違某言中興之業未見其可高宗側身修行以來天下之士四方獻進接踵釋白袍取通官美職衆矣嗚呼君之言不用而身無成亦豈其命也歟後七年君始入太學學法不許上書君亦絕不及當世獨場屋對策猶抗言如故以是無所合夫親遇明主干說悟意九筵之室可陞而登屢省之歌可颺而廣也尙邂逅不偶况一夫之取捨何足動心乎隱顯窮達之際在君可以無憾矣君所居號陳營

里其先自蘭溪來至君九世先造一宅推與兄塘瀆疏通衢路回達華棖複廂如邦侯邑君之宮又能薄己厚人赴其急時多貸少償鄉曲常依爲惠主此雖不足以見君之材然士蓋有一不得於世則銷墮摧折併其餘不能有爲矣是故不可無錄也君年七十卒淳熙五年十一月九日十年十月辛酉葬東山夫人黃氏一子曰雅言先君四年卒雅言之子曰昂從余三十年請曰某常欲以吾祖爲託至是始克有言也銘曰

徐樂嚴安幅臆見收有嘉秀伯良亦其儔誰不我與東山之休

朝議大夫知處州蔣公墓誌銘

蔣氏本陽羨人梁普通初渙爲永嘉守渙弟湛以西華奇山也留居不歸武帝賢而官之命後守卽廬授焉故鄉名建牙至公會祖錫祖扶父贈中大夫惇及上五世皆家郭南公諱行簡字仲可學不爲舉子達於世用器度凝審登紹興庚午進士第時荆帥孫汝翼從事查籥皆名士傾待公遂與薛公士隆壻孫氏主仙遊縣簿辟四川制置司屬官罷爲滁州判官虜亮且反公請調丹陽弩手

三千守清流關副之州兵滁可保也主兵官笑不應公遽令遠斥候虜既大入  
滁人徐渡江僮妾不逃器用無喪又督運於天長傳言虜兵至矣令尉欲棄葛  
菱而逝公曰姑止急燔之毋爲盜資虜不敢進有以擅焚糧請劾公制置使劉  
錡曰此真知兵也乃已監明州市舶務舶船至卽日抽掣親自評量隨瓮細立  
盡老僧束手蕃客跪公前昂其首加手於額拊地以謝秀安僖王數曰天下安  
有如此好監官諸司相謂不旬月舉員畢知海鹽縣太守告公曰縣壞久欠州  
用經總數巨萬得材令庶補足乎公正色拒之已而新錢有餘舊欠亦補及季  
年餘錢一萬一千倅行縣知之促公使具鈔公曰此夏稅錢代者事爾倅曰使  
君方以善理財薦公何必留錢爲後人耶公縮舌駭曰善理財豈美名歟倅慚  
而止還朝哀平生著書五十篇號樞言上之執政愛其文曰院轄選也公不顧  
去通判興國軍大旱疫被數路公從一馬二卒齋吟咀藥半夜宿村舍空常平  
以救他日過之所至輒數千人送迎知軍怪問其故皆泣曰昔不遇此通判吾  
屬闔門死矣知峽州歸舟無輜重有壓動石十餘絡棄之王丞相同僚也周丞

相同年也爭勞公良苦曰郎有闕可待也公力辭曰重內輕外無甚於今某老  
 矣朝謁之禮不堪也知常德府諸司舉異績對後苑清暉殿光宗面稱肯十數  
 晝時送中書值留丞相引去逾月不決不果用知處州公治郡以愛惜知縣爲  
 本獄訟賦輸使任其殿負文檄付遞鋪一人不至縣庭武陵二年軍律嚴靜蠻  
 獠震服省地晏然括蒼去鄉近治之尤詳更造板籍隱寄飛寄影占僞跋悉釐  
 改好溪堰旁山椿篠所聚請於朝禁席勢冒佃者貴人不悅提刑以爲慢己御  
 史亦妄疏自朝議大夫貶二秩罷公既休局小室繆篆郁芬竟日却坐客至請  
 入莊語而已慶元二年七月二日卒年七十一其明年七月八日葬膺符鄉瞿  
 嶼乾山孫氏封宜人後三年卒男五二早夭伯輿從政郎邵武縣丞亦已卒叔  
 輿承直郎新岳陽軍節推季輿迪功郎婺州司戶孫男十一人女八人公仕不  
 希名譽誠意爲民海鹽興國大兵後不陞降物力公始行之數爲上言百姓困  
 悴可哀果闔大軍錢比他郡獨重峽州茶租均之客戶興國馬料□數於五等  
 衡袁歲取麴引贛吉日較賦罰江東白收板帳湖南倍折冬苗夏絹和買已非

正賦復有軍衣和買糯米科折止爲省務復有覆紐價錢若此類聞一知十窮民何以堪命今大吏無不言州縣窘迫以咻公上以臣所見誠有窘迫之縣曾無窘迫之州占吝公事視同己物狼心不厭矣雖與數州窘固在也臣欲擇朝士曉暢民事者先於一路考財賦所從孰經常孰橫斂某創支某定例何爲而有餘何爲而不足使遡源陷失者稽其違汙流費耗者訂其失抑配白着虐取諸民者一切論奏蠲除之富哉言乎太史公所謂可著廊廟者也聽公之言行公之諫則膏澤烏有不下於民者哉初河南郭忠孝子雍遜居長陽山公將出峽來見於白羊極言天人性命郭君曰天命之謂性非天命則不謂性也率此斯謂道也修此斯謂教也公又問雍得於兼山最要者郭君曰所得在良良者限也限立而內外不越天之命我限之內也不可出人欲限之外也不可入也或爲著白羊問答行於世然則公之所存可知矣夫良有止而無限居不獲之地立無與之時其止命也豈有欲於其間哉苟虞其未至於無欲也而限以止焉則或可矣而非止之正也余聞古之用人勝流一也平進二也科目三也干

澤四也勝流者有所激發以厲其節平進者無所附離而行其志故世莫能好而科目以券內必取干澤以鑿空速化雖左雄山濤復生不與易也嗚呼蔣公終老不伸又奚怪焉叔輿又言自韓侂胄朋黨論起士大夫或去或逐公始欲謝事及趙公汝愚死公痛其寃因驟感疾不起噫是增異矣無彙征之利而有朋亡之憂何耶豈其好惡取捨一斷以義而不以己參之耶銘曰  
西華隱者巢許之流其孫以之以銘斯丘

高令人墓誌銘

蒙城高氏六歲父爲京山尉能助其母思父輒涕泣父歸乃已從知象山縣父思慮所不及必左右之爲余妻賃舍甚貧閉一間終日不聞聲親饌粥針十餘盤魚肉鮭菜略具人或以爲難官視祿上下月儲以奉舅次伯叔羣從無餘所食者太湖蔥城東菘芥爾服飾進止常儼然見者皆尙其華整不知其敝故洗刷而然也晚歲三子始育始有宅居稍墾田不市糴然自處一如其初蓋其剛簡無欲余所憚其靜密有智余所服其多能而易解緩急中程識事本末大抵



余所資以爲家也嘉定四年十二月初十日年五十二卒五年三月二十日葬開元觀後山余觀自古特立獨行之士無所復望於世而旅泊其身以苟免者固已衆矣是不足悲也然而豈亦不有夫順親和戚之屬而爲之託焉今余非敢謂特立而獨行也然既老而休且病且衰且暮且盡而高氏迫不余待遂棄余以是使余無順親和戚而爲之託也是亦不足悲乎銘曰  
千世之遠兮百年之長天寬而地闊兮此爲何祥

葉君宗儒墓誌銘

君葉氏名士寧字宗儒自上世居樂清東鄉傳序甚遠最爲舊姓父良臣有塵外趣雖在田野而散朗簡遠言不及利對之泊如也君寬中少忌習見其父能賤糶薄責休病哀死昏夜救村落之急一皆遵行又稍推廣之人以爲恩已及從王公詹事游王公云此吾暮子立朝行事多以告之負氣落落旣不自降屈曰安能長爲舉人而有百年之宅千歲之田前臨清流旁接高阜亭院深蕪竟日寂寂故人邑子常候門下行路惟聞棋聲出空虛山邀谷嬉意到不擇每樵

歌夜動權謳早發水邊林表往往覩墜杯遺屐焉然則不吝其力之所及德施於人而身忘其憂足以稱善人矣夫余十六七識君時君亦尙少言論英發是非非不肯假借余頗傾下之因思仲長統語甚羨君所爲而君言吾寡兄弟子同姓宜爲宗余謝不敢當然內嘉其意自是不相聞嘉定三年君養疾州南始復見之鬢毛雪白追記昔日相與把手絕歎蓋年六十六矣遂以九月丁亥卒里人爲燃指祭祠旣死皆出涕四年十二月甲申祔於父墓娶周氏一子曰賓三孫曰晉曰普曰魯將葬賓垂泣曰始先人有言儻在今日敢以請昔孔子遇舊館之喪而哭之哀脫驂而賻之門人譏其已重而孔子辭焉曰余惡夫涕之無從也嗟夫銘不愈重於脫驂乎余與君之偕少也遇諸塗之罔也託余宗之厚也去之五十年而不忘也是皆無從之類也聖人猶行之而況於學者乎故爲銘曰

鴻冥冥芙蓉之上鷺振振黃塘之下有揭其藏示來者

李仲舉墓誌銘

李伯鈞字仲舉柘溪人繇永嘉汎枝港盡汝而至柘溪則別爲聚區風氣言語殊異其中洲四絕水陂匯深緩草樹多細色敞爽宜遠望舊名蒼墩溪之温厚處也其十世曰岑號蒼墩先生父曰嵩分寧縣尉仲舉甫十餘族里有大事已能相可否老人咸異此兒及長足智恢達以義理勝血氣倥傯難理雍容應會迷謬不決斂疾赴機而又外文內質章采粲錯輕重襄序主於敬共粹與之遇無不心暢神懌謂其對大賓入清廟矣問其方自溪谷出尤駭莫測也鄭景望薛士隆引爲親友曰不幸而仲舉於世之味薄斯人者豈以章句限之所謂不可小知而可大受也得官調監慈溪酒恥之曰吾何忍誘飢民捨其糠覈而遁於醜糟耶謝不起蓋仲舉之業成矣而年不究踰四十而卒有子曰源字深之材藝德器如其父而居身益莊與人益畏隩室煩暑常整飾不惰廣庭狎聚揀語無慢情廬舍用器皆有常度不醉飽於物曰吾父祖乃爾吾何以堪之有瘠渴疾未嘗離書曰吾師也疾憊惟燒香曰吾友也始仲舉使余與深之游余甚幼而能記仲舉言行象其風裁至今想見之深之少余二歲余從童子戲深之

儼然端默余慚爲棄戲斂衽余謀於四方間一歸而見深之寡言笑康色如故  
余病且老不出戶故友影絕問深之則曰死久矣其子義方實來則喪除矣悲  
夫仲舉父子積五六十年家行修本學明固將施之而固止之耶豈天之不相  
道歟文王曰譽髦斯士成王曰烝我髦士髦士非科舉所謂士也譽之所不加  
烝之所不及科舉蔽之也以科舉論天下士失士甚矣然則非天也深之卒於  
嘉定五年年五十九三子義方長也曰義問義崇爲弟後女一人嘉定五年十  
一月辛酉義方改葬仲舉於先墓後而深之從焉銘曰

所謂伊人山高谷深鶴哺於庭猿乳於林怨耶非耶而有斯吟

朝請大夫主管沖佑觀煥章侍郎陳公墓誌銘

思誠名景思姓陳氏信州弋陽人用祖丞相文正公恩補承奉郎監平江府糧  
料院光宗初卽位詔天下言事思誠甫踰冠上十事多一時要切授淮東總領  
所幹辦事光宗不豫定省禮闕百官更諫思誠亦引李唐山人語極論任職廉  
善總領薦其材與籍田令遷太府寺主簿序本寺丞遷宗正丞兼金部郎謁告

視兄疾於當塗兄卒不忍復朝乞知衢州未至除將作少監兼尙右郎刪修勅令就爲監除直祕閣兩浙轉運判官陞副使故事運司雖名察兩路其實內不過應辦宮禁外往來部舟護虜使客而已及思誠所至則延問窮民遮道詞牒皆灼見廋隱予奪中情百姓駭歎云前此未嘗也爲杭學築門設戟儀比他州置錢塘左選監渡謹視重載覆溺者管內受輸多取者預催者催已倚閣者皆禁訴水旱而過限勿禁也民所願得輒來請思誠必議所以推行之皆曰方知有運使矣內引奏事言鎮江府折羅虛額當罷紹興府和買額重當減夫國之根本在州縣州縣根本在民欲裕民力當寬州縣今猥云裕民而急州縣若星火視其敝壞如鬣鬢此誨使病民爾非裕之也思誠美儀觀音吐融暢上固聳聽因問其家世思誠奏大父康伯相高宗值逆亮送死竭臣子力賴累聖威靈幸而破虜臨內禪特詔定策自請退休得守鄉社都人稱贊曰所謂衣錦晝行者也上益喜書歸錦堂三字賜之尋又賜服三品內出金帶令繫又進直煥章閣遷太府卿兼夏官侍郎時開禧元年二月也初用事者專國久規鈞奇功威

服內外術不素講而先事挑敵在廷不獲聞思誠聞而未察也一日集侍從官議虜移文變色叱咤曰國恥未報也彼乃以近事責我盍遂正名乎衆相顧皇恐對不堅決思誠曰昔孝宗慮此久矣遲回二十餘年終不敢發懼發不勝則安危存亡之所從分也今財窘兵窮貪將朘剝外約難信內心弗齊且辛巳之役只勞師一項傾倒經費遺患至今征伐重事也後不可悔悔而復和恥益甚爾何報之有用事者與思誠親冀其助己至是大怒亟命提舉玉局觀明年兵四出月餘已潰散略皆如所言知鎮江府固辭移江西運副歲荒流殍係路而官糴至四十萬甚急思誠通借有無命州縣無敢遏糴喻寺觀憇徙者死爲瘞藏發椿管舊積見納令住輪飢民賴以活而官糴亦告備市人時其出設薌華敬禮之既而虜再求盟用事者以罪死思誠前議雖戶曉猶坐親嫌例罷二年得冲佑觀起有日矣先時豫章火思誠親救撲因感寒疾時作時止遂劇以嘉定三年五月二日卒年四十三上惜之命復直煥章閣致仕四年十一月八日殯鉛山縣仁義鄉楊原夫人湯氏封宜人子曰橐曰梁皆將仕郎思誠競朗通

達而以門閥自畏問學師友出於嗜欲余客錢塘不擇晨暮過疑難填臆至其舍論辨從橫僮御必盱食而返爲僚於徐夜失眠者再三矣朱公之在建安接牘續簡無曠時遠質方聞遍扣尊老不以寒峻爲間也攻僞旣日峻士重足不自保浮薄者以時論相恐喝思誠每爲所親正說不忌與朱公書具言其無他公答曰其然其然韓丈於我本無怨惡我於韓丈亦何嫌猜乎所親見之意大折道學不遂廢思誠力爲多邊事將作思誠諗故余告以立說有先後定計有始末無誤也思誠復言虜衰有徵矣余又告以魚爛瓦解其實未見今外弱而形飢非也思誠悟曰決矣先生當知我爲不預人事者未幾果以議不合去嗟夫廣學而壹好如思誠之厚其本鮮矣至於以民爲貴而聚其所欲以去爲輕而行其所知則又今世之難能焉使稔於歲以究其成殆庶幾哉始湖北提舉直祕閣名安節長子曰景參字守約次卽思誠母福國太夫人韓氏賢而早寡課二子釋紈綺飽疏稗勤苦惜日故皆有名譽登進同時華寵矣不十年相繼殞落福國安命委數無甚過之哀獨計曰吾兒未有銘使梁來請嗚呼思誠萬

鍾養其母順道也今搜石寘冢間奈何累老人耶銘曰

美□紹隆名相孫中興十事八九存驥稱其德揚和鑿玉以受治成瓊璫簪  
閭俗裘絮溫奮袂決策風霆奔亦既上升拱帝尊胡乃下斥游楊原天不與年  
人道昏母悲子啼記斯文

校書郎王公夷仲墓誌銘

進士試御前考官定號名來上所謂高第者天子常親擢賜之天下以此占上  
意好惡而士之遇否治之通塞係焉紹興二十七年永嘉王龜齡爲第一臨海  
王夷仲實第四於是高宗臨政久日新其德思與草野奇傑士共起世務遍閱  
所對策取能伸直節吐敢言者無問下第卽拔置之而夷仲至舉司前後頓挫  
十數往返僂然窮老矣忽一日受明主不賞之恩如此龜齡旣爲一時所宗而  
夷仲與同時登甲科者亦皆獲重名於世至今稱策士之盛必曰丁丑榜爲然  
然則豈士能自高耶蓋上好之爾夷仲衛臨海縣人曾祖安禮祖居中父庭筠  
解褐婺州推官滿秩待太學博士闕召試爲祕書省正字兼聖政檢討官遷校



書郎足疾乞玉隆觀明年乾道三年年六十一疾甚以六月五日卒四年二月九日葬重暉鄉唐奧山夫人賈氏先一年卒後三十二年長子似之卒次曰應之免解進士幼曰斐女嫁故知池州趙善臨孫曰象祖曰革曰夢龍曰丕祖曰淡曰字孫曰文子斐夢龍中進士第斐浙西安撫司幹官夢龍信州教官始夷仲在婺孝宗立賜軍兵錢州無見緡未給也守方晏賓卒不顧衝幕徑上雜坐妄語夷仲聞變步行入府門卒望見卽招手下曰節推來躬聲喏如平日且愬曰侍郎犒賞遲又欲折支與健兒懣夷仲笑曰汝誤矣卽位例將四十年兵火散落我攢檢方畢何得爲遲錢已在庫何名爲折卒稍退夷仲白守借於他司俄又報兵士毆庫吏死矣夷仲怒叱曰汝不聽名次而亂取必斬無赦卒意折皆曰依節推說始散去州人極以此多君括有二士人家銀見官爲烹採而吳郡王自右曹符下攫取之士拒不聽吳謂其劫也移數獄至婺夷仲諷守守曰吁是力足畏也夷仲曰畏理耶毋力守因以委夷仲亟至右獄問詞主安在吏曰官人也隨司爾夷仲鞭吏急追詞主將械之其人大懼首服士幸免守併以

此知君既入參政事故決意薦君矣在館爲省試點檢得詩賦卷白於衆以爲絕出也獨一參詳及同知論未合爾明日同僚來告曰事去矣同知陞諫長參詳亦入臺矣夷仲曰不然此程文工拙也無關臺諫力辨之竟放高等四方士補試於貢院晨門未啓值忌日行香至親王不得前取別巷過宰相街司競棘叢中或傳坐此罷太學矣夷仲輪對從容爲上言上曰聞無賴者亦來耶夷仲曰誠然萬人之聚固無不有然異日爲陛下棟梁者皆是也上意解浮語漫息故夷仲雖不及預大議而果決敢辯危事堅正能遏橫流余又聞一日上批夷仲及張校書恪皆爲察官當筆參政使所親賀曰上不知君選人明日爲乞上殿改官也蓋預計欲言者夷仲皇恐辭曰某叨忝未逾月便作御史人不謂有徑路乎懼終不許因草劄若備對者言考第舉員而後改官不刊之法也近世或入穀或獻書或父祖勳伐或特旨上殿皆得改秩雖繇權道徒啓倖門非祖宗意也所親果復至曰上命無庸辭也夷仲出其藁知不可奪遂兩寢之其於進退又能自重如此居貧尤厲操贖質而得金價十倍家人有喜色夷仲趣使

還之曰五月披羊裘而負薪豈拾遺金也攝倅十月食本俸而已倅時攝州兼取之有司劾其罪倅窘持券五百祝夷仲曰請書紙爲驗夷仲反券與書嗚呼夷仲不幸而不盡用然迹其素守本末而後知高宗之親擢可謂知人也己銘曰

著作佐郎錢君墓誌銘

君錢忠懿王九世孫五世祖端州司理名尙自錢塘徙温州樂清爲其邑人祖堯卿孝友任卹有實行紹興中州舉孝廉未及召而卒因表其居曰孝廉里父選贈承事郎君名敬直字敬子紹熙元年試禮部第一或謂士人以祧廟諱自名宜避因改易直而字季莊教授太平州入爲太學錄博士太常博士祕書郎著作佐郎以疾得知池州嘉定四年五月丁亥卒年四十四於是池州未被命也朝廷以故例在館者官其子衡之將仕郎宜人翁氏先已死遂以六年十月辛酉僭葬孝廉里東偏曰獅岩次子曰德之二女未嫁君十歲能通記春秋三

傳以其意作場屋文字機捷開闔腴澤粹好長老之有科目立聲價者反媿之曰是烏得爲童子耶稍長學知古人統緒廣大高遠則遂慨然歎曰時文不足爲矣常積書自繞爲至夜不解帶旦不頽翻研覆精必以己所自到者爲是繇是雲蒸川流筆態橫生膏潤冰釋義理溢發玉縝金輝材質早成性尤沉密不輕用所能蓋人羣居論難鋒起時方人以病物君不出一語人莫能窺頗疑君循默爲身計朋友或竊議君聞殊不介意至在奉常乞爲范公祖禹謚正獻有內侍得旨賜謚者拒弗爲謚人始知君能於事有短長其間矣在太史因火災迫宮廟時君疾已亟臥床令兄子本之抄藁封上自宰相近臣及當時要務略皆盡言無隱於是人又知君能陳義憤激奠而後發時而後言也爲善獲譽其報爲福常理也好惡變遷真僞難知以善爲盜則譽方爲謗福方爲禍亦常勢也君不幸立於問學之末流而當好惡毀譽之未定進而與世偶疑若多禍而鮮福矣然君廉不爲劓方不爲割不形物以明己不離衆以獨立也世環視而不得短則深厚不伐之名交歸之而大官美爵將傾赴焉人謂君必以此貴重

矣而又遽死嗚呼合人之所不能合而猶不與入以其所當與是天之爲耶雖然合人之所不能合者正其義也非求合也不與入以其所當與君子無怨於天可也銘曰

一縣始集兮填如堵牆朋來數州兮紛其盈堂繾綣我從兮三十兩霜今弗顧兮悲安放天高高兮地廣廣詔無窮兮靈勿爽

劉建翁墓誌銘

莆田劉起晦字建翁淳熙戊戌進士及第任福清主簿監建康府權貨務知貴溪縣江西安撫司機宜召試祕書省正字兼吳益王教授開禧元年五月卒葬石室西原夫人方氏二子曰希醇某官曰希深建翁父名朔莆人號二劉先生者先生歿乾道中年太早非顯官家薄不自振業天下悲憐之曰是寧有子耶及建翁勝冠帶克邁競強志義修立聲名遠聞人士皆喜走相傳筆相告也既中乙第愈益喜爲勸飲相樂也仕所歷無不爭薦君曰劉復之子渠可後之建翁有所擇曰某不宜受亦不敢怒也然所薦不過關陞改官則固州縣常舉爾

至爲館職然後厭曰足以待建翁矣嗟夫建翁底法父不忝父致大稱譽自其理而天下於建翁父子乃鄭重不已如此亦足以知好善者人之同心而爲善者之不可怠也建翁韻甚清氣安而貌和懸會宿解不以滯吝嬰物事雖漫汗麤梗經建翁手必有條流秩序後可循守也治縣極寬不爲節限訟者從容各盡其辭已而敷暢折衷隱情遁節如鏡見象姦民未嘗不避影斂跡也市里寒人必知名數雨雪凍仆計口與錢米疾癘天行自煮藥不幸死給棺斂縣東起孤獨廬西安樂坊歲減斛面米六千石糴本錢六十萬貴溪人謂建翁不曰知縣曰吾翁也故聞其卒罷市聚哭爲佛老事五晝夜建翁旣爲上下信服同時有作邑者內不善爲正字其人適在言地誣奏罷之夫舉一世所愛不能勝一人所忌使建翁稍進用必爭是非辨邪正決不能使一世盡愛建翁也然則世之所以愛建翁者豈能知之哉建翁內事兩世母奉從兄撫幼弟外交友朋接鄉里通無共有盡敬極孝一如二父人不知二劉已死也居室尤陋不改余間過之及門而下建翁逡巡出迎中街笑曰自二父在而四方之過莆者無不造

於庭蓋今之轎大於舊矣乃世變也余亦笑曰轎雖大不數寸公門扉無乃太狹乎而不知變耶其偏整四圍之僅通戶牖建翁指示余此吾二父講學處也余低徊久之不能去云銘曰

建翁之於父材德同年壽同官職又同曷爲踰之而有不逢悲哉

華文閣待制知廬州錢公墓誌銘

公姓錢氏諱之望字表臣常州晉陵人曾祖孟回殿中丞祖知雄父友贈中散大夫少放達喜奇策虜亮至瓜洲參贊虞允文方課水戰公請呼海船在澄江者雜舟師上下八面乘風截流若神賊駭不測可沮徑渡之計虞公行其說且問今當何向時虜號百萬江東危恐公曰兵無衆寡勇者先奮躁者先敗賊雖蟻聚而棄信殘酷驅脅遠來下莫順聽此內潰之勢也願無怯而靜以待其變未幾虜殺亮而遁符離之役道謁張忠獻公曰相公何不三邊並出使彼東西奔命大功可立也今獨趨海泗一不如志疑謗交起無能爲矣竟如公言登乾道五年進士第授襄陽府大軍倉虞丞相錄前驗差江西帥屬賴文政反前帥

龔參政茂良白上以賊委公公薦黃倬可用爲方略授之立擒文政改官增秩公奏賞倬宜厚臣濫恩也可損上多公讓從之以宣教郎添差通判鎮江府母喪免再通判鎮江府知光州未行知楚州上猶遲之改知和州初上令建康都統郭綱及淮西帥漕實官田括隱占使兵爲耕公極諫括田擾事不速集但擇故荒圩美田五百七頃溝墾牛犂踰月皆具兵亟就屯民不知役和故任武守連數人益壞公檢御有方郡復完代還上論事甚久因歎機會無有公對今有之恐陛下未能行上愕曰何謂也公曰曹操伐烏丸劉備謀襲許今虜酋往上京兵將從者十七八儻鼓行卽前彼子悻於室父困於塗往返萬里士馬疲極將何以戰一二日之機古人必爭況歲月懸隔乎上拊床曰好機會無人道此除金部郎官俄知楚州用屯田勞直祕閣議者以濠楚使効多代名自今逃死須言上乃得收既有旨公言乾道初招魏勝郭昇張榮義從人給田勿課役勒五部月一至州習射犒激名曰使効蓋陝西弓箭手法也纔三百餘人耳州縣惡其鑽銳難制死亡不復補甚者抑不令赴州失本意矣然則非官所廩安用



代名雖曰免稅而所謂歸正人皆未起課役非以使効故特優幸議者殆未詳也公遂募五百人部伍情熟盜不敢發於是上令教兩淮民兵萬弩手而公選勝兵七千八十九人參之軍制束以隊伍別以事藝嚴以訓練他日上遣官拍試獨楚應格始公患大軍更戍無留郡兵山水寨不就律無以應敵自徐子寅於山陽寶應置三十六莊寨禁無得私有軍實犯者衆而羊家寨瀕大海姦猾所聚公籍其尤剽悍二千三十五人約爲急難備且弛禁許挾弓弩自便皆感悅從命有李植者自言宿遷人韓世忠罷攻淮陽植父將與宗族鄉里自拔從之今已零落尙四五百家公歎曰諸葛孔明西縣之民也令植轉相語得四百十六人定其要東與莊寨同上爲特補植官在州四年所行多此類進直徽猷閣公又條三邊戰守事曰揚州有三城三塘楚有大小清河淮東恃此謂扼虜來處足矣虜設乘虛自招信盱眙抵淮陰不一日薄揚州不二日滁真通秦亦徑至江上彼兩路何獨不然陛下可無令韓琦范仲淹者通一路險易熟議之乎且卒飢財匱兵少今日之大患也然而卒欲飽則財愈乏矣財欲無乏則減

兵且不暇其何以增若兵自耕民自戰沿江諸軍各擇地分內閑田種之而民兵萬弩手用一法給器械較精惰略計可十五萬與屯田大兵相參此三路之郭郭也昔韓世忠在鎮江張浚在建康淮東西便爲地分大儀天長昭關柘臯虜來則戰豈有定所三衙助之所向克捷近諸郡修城築堡遣兵更戍犬牙占認尺寸之外胡越自分如是則誰肯出力會戰於要害之地耶臣觀諸軍氣習今昔頓殊昔欲戰不欲守今言守不言戰馴致疲憊十年之外雖守不能矣陛下幸詔諸將復紹興地名使如世忠浚輩苦戰立勳夢寐庶幾無令消磨坐相視盡孝宗省奏太息曰方天下無事人樂安靜莫肯更張此論可謂憂深矣時光宗參決上顧曰太子熟看人材須用方見和親久材無所施更無事當遂委靡朕思之慄然太子宜常在念錢某可使帥揚州是歲淳熙十五年也兩自五月至六月清河溢墮城千丈公拊循賑貸恩紀勤備楚人德之進直寶文閣知襄陽府言者謂公昨在楚旣修城水卒突壞削職罷公始至楚以舊樓櫓不壯易之千間城敗非樓櫓咎蓋言者誤也知靜江府私錢濫惡流入兩浙朝廷議

禁絕提點鐵冶劉煒請以私錢二當官錢一抽貫數百約其多少府庫皆封鑄市邑關閉兩淮騷然公四疏言止弊息姦要在安靜淮東地不產鐵人不私鑄貨幣轉易民何罪焉且天下安危在邊北使過淮耳目所接繫國體尤重上悟以官會椿管米度牒僧費數百萬緡盡收淮東西私錢納鑪鞴中而後少定然時宰諱公言切竟以失察私錢坐鑄一官安撫司兵自劉綱向子固有東西寨使効晁公武有效用郭棟有效士有強勇名號雜軍律不齊豪盜隱伏爲一方患公請併及強勇募材武足千人隸御前置統領守將之宿蠹始革公之在揚會復治兩淮民兵而公在楚日旣施設有緒至是遂具爲一路條目取丁結隊執色總首分部開收任責七事上悉行之仍下其法於淮西及將進丁入老公手書屬郡喻上指懇切選丁壯四萬八千二百餘人增舊籍三之一於是淮西趙鞏奏罷萬弩手上付公相度公奏紹興末孝宗命張浚置御前萬弩營於建康癸未戍泗州甲申與虜鬪皆有功乙酉講解散歸其家乾道中令徐子寅復置于真州其後就田自便不復喚集二十三年矣弩藝劣弱壯健銷墮鞏所見

近事也至於土著無逃亡之患自耕無坐食之費民兵萬弩手最爲近古孝宗所命浚所行不可廢也不原其立法之初而議其受弊之末則羊亡而禮從之矣萬弩手得不廢蓋公在楚四年在揚三年及前後反覆爲上言大抵以屯田民兵萬弩手山水寨爲進戰退守之要始末皆守一說思虜皆執一意非若他視時上下隨世改易揣摩而投合之也王卿月使虜道病公代之旣除直龍圖閣再任而言官以公營運販易降顯謨閣罷初公之併強勇軍總領必欲使揚州自當券食之半公爭不獲別爲營運以其息給之又力爭曰御前軍而仰食州郡可乎五具奏始已以本錢歸備邊庫自是公屢被詆輒黜有造遊士之獄者索其楮中得公彈文檢御史所上不差一字復以公提點鑄錢事留爲軍器監實錄院檢討官將用矣而大奚山盜起改除祕閣修撰知廣州大奚孤峙海中去州一潮汐民煮鹽自業漁採亡命羣聚吏兵容之非一日提鹽繩之急怨而爲變諸司招捕前却異同紛紜賊愈橫遂空巢窟奪客舟徑指城下州人大恐將逃公麾諸軍奮擊一戰殄滅列柵山上分兵戍之微公決策廣東幾亂併

闕官罷攝士捐丁田米分鈔曆日錢歲萬七千緡場務積欠四萬餘緡珠香翠毛不買一錢除華文閣待制尋知隆興府蕃漢攀路涕泣改知廬州至數月疾病參半猶自力判諸司累訟不定數百事光黃民爭持曲直詣公會最郡用除其冗復歲省萬五千餘緡衙兵兩寨以客將書表爲將佐公一澄革又以安豐忠勇軍不治奏斥統制邊公彥欲考詳沿邊利害別爲綱目而公病不起以慶元五年七月十八日卒年六十九廬人及淮西人待公疾瘳投詞者千餘人嗟嘆曰包待制死耶作十五詠詩以傷之六年三月十八日葬江陰縣昭聞鄉絲里山令人何氏後公四十二日卒祔焉子延碩早天廷玉某官廷瑞某官廷玠某官一女先嫁戎知剛再嫁某官孫男二孫女六階中大夫爵晉陵男初孝宗雖脩紹興故事復與虜通使而以其間討軍政講邊備陰擇奇材爲有事之用親擢下僚至貴顯數十百人公能最高誠款內發事有不便陳義指切未嘗顧望所建置後皆遵行不敢變然世未能知故具記其言與事所以見天子鑒識盡下人臣憂懼思職而公之遇合可考矣銘曰

孝宗上聖忘己好能匪徒好之超俟躡卿時惟錢公百選一逢材如源泉汲用無窮揚東豫西越南雍北四郊不警雖警迄息冠帶羣胡韶勺世警畏戰靡靡明主所憂孝宗賓天公困多毀侍從晚矣歲月弗止既謀既明既勤既成當時不知況彼後生孰遠而存孰堅而朽我垂於文以俟夫久

水心文集卷之十八

水心文集卷之十九

墓誌銘

中奉大夫太常少卿直祕閣致仕薛公墓誌銘

初公繇少奉常領祠官至再焉未七十屢自請以直祕閣致仕家有司馬文正公真率約接舊事率年及六十者行之余亦預往公園池不多而花草疎闊游止自在樓甚低小而江山隱約可識書畫精麤雜而觀者各有取惟靈壁石舊物也相與考擊爲樂如是歲一徧不幸客衰殘多病相繼死數人諸公悲痛自爲集錫麻帶經而哭弔者避席曰真率翁來矣余因戲謂是率者率人於死而非以難夫老也旣而公亦病真率竟廢嘉定五年正月二日公卒年七十四二月壬午葬清涼山嗟夫豈天於閑退之樂不輕與而昔之壽考強力特偶然聚而非可齊耶公諱紹字承之其先自河東徙閩長溪有令之者仕唐至右補闕人以其廉號其居廉村廉村之後爲永嘉人薛氏大於永嘉三百年矣公魁重凝特造次不以詞色自達而誠意內充與之遊久者皆厭然心服登乾道二

年進士第授台州推官州用急釀者滿城幾無權矣陳守巖肖憂不知所出公曰易耳命徹舊帘有自門堂來言薛推官新酒美而賤相傳徧一郡飲於家者悉從官市衆壚束手權緡十倍更事向守灼向老吏檢御有繩尺尤器公以爲能繼己余從公遊前後口灼數十不置知公有得於灼也監車駱院知鄱陽縣訟日千數令故不訾省爭氣怫鬱簪筆走諸司公曰息爭莫如理訟至常夜丙鬚髮爲白太守所遣卒詬於庭公囚之守怒罷民挽公流涕曰知州豈重一兵輕百姓耶知宜春縣前知縣有柯長卿邑人紀之故稱前柯後薛云通判無爲軍攝知州積寬剩糴米餘十萬紹熙五年歲飢賴以無死知真州提舉浙西常平茶鹽就遷提刑有竊富人婢以逃其家謂主殺吾女州縣以成獄至公却之曰安有殺人而無驗者未幾婢果自詣除戶部郎准東總領遷太府少卿且滿難其代復留年餘召爲太常少卿淮東用鹽餉軍務場趁賣無法率以鈔當錢冒賞至公常賣實錢三年間增多三百二十萬貫執政駭異莫知用何術謝丞相從容問公公具以實言丞相歎咨良久指其榻曰此公坐處也而深甫叨之



過矣公既謝所引而於韓太師侂胄未有納也異日從陵下歸韓曰陵樹比前殊蒼蒼耶公答陵廟至重非被使何敢覘樹有感衰不可考然頃見吏云補種若干今青活若干矣韓悒然止忽又言少卿來幾何時亦何欲公但喏喏退亟辭於謝遂行嗚呼公不自結於韓而自必於去其中蓋有所守世固未察也又公乞謝事時錢丞相素厚公留公許用公公卒不改以就其執信如此人亦未知也秩累中奉大夫夫人洪氏封令人先公卒子曰師巖南劍州司理曰龜從湖州司法曰岷武當軍推官曰師武監隆興府稅務曰師睿早卒龜從及己未第而岷國子監所解進士也長女爲道士曰監省倉上界門林士尹曰建康府錄事參軍黃時憲壻也初公在真州有倡單流涕言其祖仕先朝爲諫臣長墜落至此無面見日月公物其世出詰其第昆皆是亦流涕饒與錢洪令人捐簪珥禡禱擇士人嫁之銘曰

薛氏之瑩清涼之麓千尺飛流百尋老木有美一人薜裳荀冠自種小草卽山而盤山旣深幽草亦茂好人兮不留噫銘是考

國子監主簿周公墓誌銘

臨海周子及名洎曾祖光恭城縣丞祖公舉父國賓子及少以文自名第乾道丙戌進士授新昌縣尉辟淮西總領所酒官淳熙戊戌中博學宏詞差江東憲司幹官除太學正初王抃起吏胥預密議嗜利者因緣請祝希薦進聲連勢合附和傾朝廷所主用其人已敗猶莫敢詰子及見上具論其姦累數千萬言曰中書舍人爲抃子行詞職爾猶借王命納詔於抃使天下傳笑而不知媿則其他公卿可以類推陛下欲開言路進人材修政事今小人在側回護蔽隔雖不拒諫而常玩諫願明示斥去且陛下盛德豈以斯人負謗上問小人誰也旣知爲抃則大寤曰朕始於卿聞此時賀會慶節故事虜使在不下除目忽中批王抃在外宮觀羣臣驚愕子及指攻抃最急因縱放他事不以紀序亦累數千言曰今宗子恩科數雖裁損此何足以救官冗耶宜自禁掖始次宰執侍從可也軍士食錢主兵官銷刻幾盡矣餓而思亂得無以唐奉天事爲戒內藏諸庫儲積豐衍今流離滿道若量出賑救此亦民財也近奏對尤謬妄者至令宰執臺

諫子弟食祠廟祿而理考任陛下亦遽從之彼梁肉稚兒豈過爲地哉本置要  
官事有當否使之豫言人有邪正使之先辨所以防未形之患哉將肆之姦也  
如害已流溢而後言從之則何及矣陛下幸擇其人諭以嚴詔自今施設未當  
任用非人皆須先事而陳無或有諱至於附下罔上緘默不言後已著明必罰  
毋赦蓋亦爲扑也語旣出聞者皆震恐失色大臣貴近惡侵己太甚側目視之  
子及不自安求外補俄以憂去除國子監主簿於是虜再通和二十年矣一日  
復還遼左聘使不至中外罔測徒竊議而未有言者子及建言近日中黑氣陽  
明耗昏當春祁寒雰雪彌月天象示戒甚矣陛下宜修德警備因列入事曰選  
將帥擇軍士遣間諜議城守備戰艦儲糧食節財用委謀臣復累數千言纖悉  
指畫如目見無遺上駭異事事折難且曰朕密設備豫卿豈知之子及對曰設  
之祕密臣不敢知備之有無衆所見也今陛下謂已有備小臣以爲未有二者  
之間願陛下留意上歎曰朕比見卿更過曩日明日諭樞密使周某知邊事甚  
詳今士大夫不如也尋召試館職旣擇曰暴得疾不起淳熙十二年五月二十

九日也三子樸栢棫奉其喪葬于雲溪夫人王氏經史通習能文工詩敬子及之孝友奉命惟恐不至故其父母兄弟無間言先子及卒母夫人痛惜曰吾婦賢誰當繼者惟其兄弟爲可且臨川名家也故復室王氏女二人適朱渭老趙師繇皆太學進士樸後名成子以上舍奏名教授澧州學按五日一輪對本朝盛典也監主簿學正皆末僚亦同五品以上奏事所以廣延英豪通下情也士或不脫草野避忌疎略此淺陋之罪也至子及不然宏詞人世號選定兩制其初爲職事官養歲月熟儀度而已議論激取決於一對非其責也然子及不顧禍福不計合否輒透盡底裏疾如湧泉驟如發機豈冒妄抵突至此哉蓋忠義憂國之所積爾余常怪馬周徒步開說是時唐業已定欲增廣大安無幸九成不封功臣及省營造教諸王擇守令下至鑿鑿鼓代傳呼皆常行見事非老謀沉策也然太宗託寄心腹遂與房杜王魏等獨未見子及之言耶其驚世絕俗何止一馬周也方王抃勢重而丞相御史相與依憑不謂太學正力能去之然則孝宗之聖過太宗遠矣余固哀子及前遭父憂後死旬朔間不得究馬周萬

一之用也豈不爲異代君臣之遇合者重惜哉子及又有論地震疏萬餘言屬  
病革不果上觀其直遂歷詆矢詞四達視岑文本所謂切理會文不可增減聽  
之靡靡忘倦蓋其細者余旣序見其大概且俾成子別爲書以行於世庶有志  
者得詳焉銘曰

斲歟惟工告歟惟著命不永延若先有知甫見天子傾倒出之去一凶人行父  
庶幾鏘其諫書鳴後是貽

建康府教授惠君墓誌銘

毘陵惠端方爲永嘉丞與民爾汝求事情實而審實其便處不以妄與奪取快  
也士後出迭唱和相朋友同蔬共醕無倦日然立於高遠不可浼近數年來稱  
州之賢大夫僉曰惠丞交譽於大吏率氣力薄吏所易侮緣是未改官人尤惜  
之丞不動意獨謂余曰吾父乾道八年三月某日卒十二月某日葬君山鄉原  
曰野山仕信州鉛山簿監行在激賞庫糴場用薦者得宣教郎教授建康府而  
已夫用不究可悲也後四十年遠無以詔吾重悲之子幸使墓有銘可乎惠氏

始見莊周號惠施而居毘陵之宜興者六世君諱哲字茂明父承事郎俊民苦學被惑疾祖父溥自教之君夙悟幼成與兄國子博士迪勵志讀書至所過者化所存者神上下與天地同流辯論往往終夕不就睡祖父欣然曰吾孫其庶乎遂皆以文學有時各同登進士第既入官以能見異以廉見敬鉛山脩廢決滯民畏愛過於令令賴之如己出守徐公林亟薦之糴場米數十萬孝宗初親政邏卒粹至一日詔捕糴吏甚急提領官召君慰安之曰廉士無恐也既上取出入籍視之不得毫髮於是周參政葵謀薦君會罷政不果周舍人麟之既薦君之兄又將薦君不果單侍御時將辟君爲屬以格不果亦會君死纔五十六矣初娶孫氏再娶蔡氏子端本新岳陽軍節度推官次端方也女四人嫁迪功郎常州晉陵縣尉錢正國迪功郎常德府司戶申洙進士周作霖王彝皆已卒孫純夫迪功郎台州司法有夫迪功郎新建康府溧陽縣尉道夫德夫自君之曾祖正議大夫智訓其子專及需始官顯至君兄弟子孫世有科目興於孝友而文字潤澤之尙德不務進雖仕不急用其家法也銘曰

湖泮紺冽兼兩峯涵暉發祥藹沖融惠君之文地所鍾如雲章天雨不從生死  
變化塞復通相其子孫與時隆

朝奉郎致仕俞公墓誌銘

公姓俞氏諱寬字伯仁臨安人曾祖舉祖昌齡世爲臨安儒家父徹尤工文詞  
與張子韶凌季文同有時名公年十三入縣學筆墨意度如成人長老皆器此  
兒行貴矣初其父旣貢辟廡避亂不行復擯鄉舉慨然謂公曰吾聞得而不止  
無義者也失而不止無命者也銜於得失欲止不能進不足以事君退不足以  
成身是兼無義命者也吾將止矣若能佐我乎於是公尙少也及父卒而公已  
壯絲粟程度如父在弗敢失旣而生有以養死有以送冠婚賓祭必具凶荒乏  
貧必與入其塾誦讀之鏘然覃思之悠然人雅多公父子不窮於儒也及已得  
仕勿亟勿徐擇義必精不爲利回與可偕入與否偕退無失道而已人又知公  
不特能以所難止者從其父而又能以所難進者詔其子也公年益侵始有山  
水花竹之樂老兄弟相攜間出鄉人見其無車馬而步輕履安相與追隨迎勞

曰福人也公則人人與語酌飲之且酌且行歡笑盡日而返嘉定元年公九十三矣子烈以起居舍人爲金人報謝使住都梁境上數月公常手書問邊事虜情祝使自愛報國辭甚壯一日呼其幼子珙曰我欲歸矣家人莫喻明日又令設洗沐未及而逝實七月乙丑蓋舍人出境之日也是年十二月壬午葬于下洪山累封朝奉郎服緋衣銀魚夫人張氏封安人子三人長曰瓌將仕郎早卒四壻王庭實高健王思恭戴宗師也孫曰垓迪功郎台州寧海縣主簿曰坦將仕郎舍人免公喪召入西掖爲侍從臣今爲中奉大夫知明州某辱舍人同僚張夫人墓竊有銘焉暨公葬又以爲請病不克就者六七寒暑嗚呼公意承其考變過訕伸以待天命卒大報之是宜銘已銘曰

涸研燥筆陋儒之酸肥馬輕裘鄙夫之盤廣能具禮約能守義天福方來導迎使至長原回回高木陰陰有式其阡昭公此心

中奉大夫直龍圖閣司農卿林公墓誌銘

公林氏諱湜字正甫福州長溪人曾祖巖祖樗父師中贈中奉大夫中奉迎師



於蜀得師先生以歸學者常數百人中奉爲高第公入太學與石斗文吳俱吳  
俯張淵並時知名登紹興庚辰進士第爲富陽尉虜亮之亂部弓手截隘處邑  
豪乘時販鹽行劫公捕擒之代歸教授明州朝廷會其勞改官知泉州晉江縣  
州分造戰船公曰負郭豈有羨錢耶何忍斂百姓將捨去諸番義公之爲助其  
役舟先就而民不知滿秩攀留空一城通判南劍太守議官自賣酒公爭曰賣  
鹽已病矣又益以酒且閩地俱萬戶也今始自南劍他郡効之君不畏入州民  
怨己乎守諱其切自爲奏朝廷視無通判署疑之方下公條上言者亦謂閩近  
瘴故二稅有酒錢而民自酤今創禁之非舊制也守奏遂格汀州賦輸無法吏  
多取自入爲百姓患帥漕請均節之以委公公索其征有公庫鮓脯食次冊差  
出貼支等錢皆數千計他多此類守俸俸數倍矣小官薄復別貸以給公約其  
歲用增損適平省緡錢四萬還之民監司更薦召審察幹辦諸司審計司遷太  
常寺主簿國子監丞太常丞紹熙元年遷監察御史公久官南方無中援旣入  
朝名人善士一見如舊識相謂曰今士大夫去就常以臺諫官賢否爲卜是公

格應入臺得如斯人者庶幾乎至是竟用公故事臺諫官居同宅相愛助厚甚彈劾論諫必相參審好惡指趣不少異曰所以共持紀綱也公獨喟然曰吾不惟賢與善是親正人之愠於衆小人是助好惡去取不以公論爲歸而曰共持其紀綱也夫紀綱者豈臺諫官爲私之地歟他日見上奏曰陛下託股肱於宰執而除授多小人寄耳目於臺諫而彈擊多君子治亂之大無過此也執論移晷侍立舍人言於衆曰今日察院爭何事反覆不已也自是與其長不合矣時小人知公意頗自爲計公與同列三人論劾甚銳至一日罷數人內外皆聳方依公爲重而上以覺察過數詔諭公公爲殿試詳定官考官直言者居第一而上不用及殿中侍御史劉德脩下遷公曰吾可以去矣劉公蓋公所謂親而助之者也公奏直劉公不報錢之望知靜江府公再論之上罷之望出公浙東提刑宰執合前願少留不聽移江西轉運判官楚多訟吏積厭苦公曰已恣睢而使民以弭筆成名乎取滯訟自判之數月至者益少免贛州科罰罷龍南安遠折變減興國淮衣絹南安聖節銀及水滌州縣窠名之在漕司者皆除之歲損數

漕計猶增於舊召爲吏部郎中遷太府少卿以孝宗遺留使虜始光宗過重華宮疎闊公再三請未效而孝宗崩上內禪公入辭首以奉親歡杜讒口爲勸上俯聽首肯數四謂吏部侍郎彭龜年曰朕初卽位未識羣臣此老成重厚人也

在道繫帶及國通名有未合者連卻虜議至賜衣以其服被公公揮擲去虜人曰君命何可慢也公曰宋正統相承羣官服視其品今易左衽有死而已爭辯甚久虜趣入謝公感服如故虜不能屈復命上迎謂曰卿守禮甚堅國體不失朕所知也遷司農卿公之還自江西衆望謂公當遂用公論事不假借慶元初韓侂胄始專國朝士多自引去呂祖儉上書爭之貶嶺外公見余丞相曰呂子約匆匆南行奈何叔世事不宜有執奏收回大臣責也丞相可不勉乎語喧一時權近側睨公因力請外除直寶文閣湖北運副未幾與沖佑觀起知泉州不樂公者猶謂不可復與沖佑畢祠遂請老進龍圖閣致仕嘉泰二年七月二十六日卒年七十一公晚而居平陽松山溫福之間也遂以三年十二月十九日葬於賢沙里夫人黃氏封令人子介文林郎孫孟嘉孟治皆登仕郎孟淮孫女

二人公合女兄弟十人兄淳尉朝陽夫婦死公經紀振業官其子弁餘弟妹亦自足再從叔貧無後爲立嗣嫁其女性淡薄散朗雖居官精敏遇事立斷而平居但教諸生誦說若不涉世故者於善惡賢不肖明白而尤護惜善類世所謂善人君子常欲以一身同其榮悴去留故議論多激發見忌於人以是齟齬廢斥而終不悔朱公元晦旣謫士諱其學公執弟子禮不變未歿數月猶走書問疑義云介錄其文號盤隱類藁十卷介喜節知類能似公來請銘余昔與公及詹元善同在太常續炬縱語以銘屬余者也銘曰

天膏寥寥分一燈耿然自照非外明奉璋來朝如景星善人視之爲廢興紹熙御史慶元卿義能扶持事不勝乾剛坤柔相降升以待後死銘有徵

草蘆先生墓誌銘

草蘆先生姓林氏名嘉字叔和黃巖縣人事父母兄無違志朋友不倍其言妻子裕如也鄰里懼如也其行旣修矣少而廣問博請長而探幽索微老而愈勤窮而益信其學旣明矣面於方山木或春彫草或冬蕃并不先汲炊不蚤熟蹠

行株坐自若也邑後生聚而謀曰得無從草廬游乎先生得無思見我乎邑大夫作而顧曰某獄疑先生決之乎某政謬草廬知之乎年七十一一日筆數牘緘題竟就牀若將寐者視之已卒其爲士者無不弔而哀如不欲生也卒之日十月丙戌明年嘉定十年正月丁酉葬於樟槿山其爲士無不送而號如不欲歸也或肖其像恍乎草廬之容也或玩其書冷乎先生之音也嗚呼世謂文華之俗薄雖躬行樸厚不能化曷不視此乎自孟子爲論世尙友之說始輕視一鄉之善蓋天下所同善者猶未足也況一鄉哉按周官鄉卽國也黃巖古伯男國也二鄉公也公旦君奭預焉一鄉卿也閔散南宮适參焉王國之善卽天下之善也豈孟子未見周禮而以戰國近事言之乎然則一鄉之所謂君子者固無往而不爲君子矣夫疑天下之善不足於一鄉而又以一鄉之善不足於天下者惑也先生之子季復幼常除喪來告余旣竊有感於孟子遂以記其墓兩夫人皆陳氏女嫁胡惠連銘曰

噫昔追隨五十年近離遠合交傾宣一札不至奄重泉矢詞如忘徒泫然

袁聲史墓誌銘

聲史袁氏名直友幼而奇傑父延孺知武進縣提舉杜師旦兼常州怒武進小書字大訶詰累至家人恐君忽立常州庭高語曰尊年邁目眇小書童子所代爾卽有罪兒坐無及尊也師旦異之乃免稍長闊達多大節葬武進於烏程厲山盡賣其產道上連駟馬冢旁置百家焉張丞相雖敗符離孝宗意尙銳論者爭言虜當擊君獨上疏今比勾踐棲會稽時粗勝不多願陛下少忍且須後卒割地而和虞丞相復與上謀出蜀師會長安君曰吳氏挾虜自重久矣今誠能臂指使從我乎虞公默然蜀師不果出旣相薦君及魏掞之於上君雅不好掞之固辭掞之獨召對後四十年君七十餘矣韓侂胄以虜自爲功士大夫不敢問君間語侂胄自古君倡而後臣和無以人臣專大征伐諸葛亮雖爲忠桓温劉裕爲篡矣公將何所据侂胄不答逾年被殺君又數上書及與執政多論天下事金陵無帥謂宇文簽書何不自行宇文不平出鄙語曰真九百君大悔恨自是不復言袁氏世家建安曾祖禪祖符第進士奉議郎奉議次其譜曰司徒

孫邵甫醜紹術之亂逃徙上虞袁晁反浙東邵甫之後復醜之又逃徙閩故爲建安人子敏孺通判滄州餉軍白溝河軍敗死之廷孺漣水軍司戶女真陷漣水亦死之季卽武進用滄州恩補官素狎秦丞相秦呼曰來吾與若共此武進但以書敘戰守形勢無親附意秦不喜武進竟不往部注知縣者三終其身蓋上虞建安之袁能以潔易汙滄州兄弟再死節武進不阿所欲於故舊至君策畫念慮必以國不以己窮苦貫推畫常守一意何義理千餘年未嘗間絕哉初虞丞相薦君旣不受舉進士亦不中第說友知衢州光宗立持其表來賀得海鹽催煎未久棄去爲常州推官又棄去以嘉定六年二月二日卒年八十五月六日祔於武進之墓夫人陳氏子五人女之壻曰文林郎江東提舉司幹官曾諒曰范希奭孫男女各四人說友事兄謹宦浸達至參知政事君無一錢食客輒爲萬錢具費皆出參政長子聘儒癸丑進士朝奉郎浙東安撫司機宜次舉儒早卒次學儒欽儒立儒皆參政奏官之人以爲難余觀君疎於世故而謀國無不中不見小利而大義常獨決其品等在春秋戰國中非後世之才也雖然

創爲強者難持而安處弱者易效蓋唐以後通患而春秋戰國所無也然則強果不可以創爲耶銘曰

遠矣聲史匪競匪營以節爲身千載同清尙其後昆無改厥承

京西運判方公神道碑

方氏自固始遷莆田九世矣公名崧卿字季申曾祖早祖淵父憲陽江令贈朝議大夫陽江歿而公生孤特強立俊異躡倫等舉進士教官中其科教授越州母喪止幹辦湖廣總領所公事添差淮西安撫司屬官員省爲兩浙轉運司屬官知上饒縣提舉常平薦審察通判明州知南安軍政最一路諸司合奏擢知吉州提點廣東刑獄移廣西轉運判官復移京西紹熙五年三月二十五日終於襄陽年六十慶元三年正月丙午葬於瀨溪公學極原本有書以來無不通習聚帙數萬多朱黃塗乙處宿疑隱問一事常類舉十餘續橫浦集補襄陽志皆釐糾昔謬韓氏文行於世二百年其始所從家異人殊不能相一學者患之公會證旁引爲書二十餘卷得以據依他本廢矣夫人葉氏丞相顥女公用丞



相治縣法分保正副旬詣邑受令保長五日一輪役當募者第其色力緘之按上民大喜上下無敢不信然公天資精于吏職在南安吉州尤稱神明其所予奪人以爲經方守者一字不可改也初廣西諸州及經略司歲用乏朝廷命轉運使煮鹽給之或官自賣或客販率四五年鹽積不售仰哺竭則多科增價而民病矣天子怛然加惠遠方輒賜爲貫錢萬者數十黜議主更法以便民公轉漕時適當官賣之後請曰夫食鹽有定口不量其入而以官用賦鹽豈官賣則善於客販哉今撥屬州鹽籬七萬五千有奇而實賣纔踰六萬稍積不已是十六郡歲用每折四而爲五也廣西別發湖廣總司錢贏八萬靖州三萬歲以爲常夫自治不暇而猶餽輓他路是於折減之外更增十餘萬以自困也然則不及十年官賣之弊甚於客販矣益下固損上非有異術待更法而後損已晚曷若自今諸州守實賣之數本路免別發之額勢足相補法可久行其言殷重惻切天子以爲然行之至今嗟夫嶺海絕徼視中州近縣不齊也彼地素薄於財則簡其貢稅兼官併吏合兵於農而因其俗以富之不備責也若夫財不足以

養其地矣奈何猶欲具體焉故公謂官賣非必善於客販其要在嶺民免責鹽  
官府粗自立而已者豈不然哉公徧行瘴土盡其利害得消渴疾醫不能愈豈  
桂人哀思之二子直孺新改官信孺開禧初挺入虜帳再結和繇韶州為廣西  
提刑運判繼公行部父老迎拜悲喜既相與畫公像春秋報祠公階朝請大夫  
贈至五品賓佐又謂應刻碑墓上遂來求文余嘉公博於儒而以吏得民惜其  
不及驗於稽古勸學之事而愛民之志利民之術又非特一廣西之鹽而止也  
詳其已行而信其未行或庶幾焉銘曰

鹽利之末挈作邦柄增多不已鹹苦為病懇懇方公斟酌行之如彼飲食時其  
渴飢方公甚文甚文且博廷發大議可諏可度六府惟修緼而莫陳獨正此鹽  
嶺服是遵墓柏成峯有闢其道嶺人之思賽禱以報

太府少卿福建運判直寶謨閣李公墓誌銘

故參知政事吳興李公以誠信質直事孝宗時天子念討虜報仇功緒未驗晝  
夜耿耿他執政多迎前趨和退即覆却異辭上固不快獨公謂機會難猝致本

根當牢持諸所與爲不宜以空意忤敵公私懇切始末至到上感公忠實久而  
順聽然後大言迎附者稍復衰息風俗浸向淳厚而自淳熙接內禪二十餘年  
天下安樂無事中外謳歌至今繇公發之也兩預政終不取相位退歸僧榻食  
纔數溢米蕭然永日風操絕俗遠甚三子伯尚書季侍郎中子官差不遂猶至  
卿少皆有業尙名稱著於世而諸孫材賢矣嗚呼教以約而類者衆受以薄而  
與之豐天非偏厚李氏蓋亦其理然也余不及從參政後而與三子躡履迹於  
朝會少卿之孤仁本以銘墓來請因竊用常所論敘者爲書首少卿諱浹字兼  
善有夙成之度少游太學諸生畏其能授承務郎監淮西惠民局復鎖廳試禮  
部詞致瓌特有司異之曰執政子也嫌弗敢上親友交唁公公嘆曰吾旣仕矣  
學有大於此者科目何爲自是不復求試盡取諸書徧讀其興壞因革一代之  
綱別自成編而尤好左氏爲作廣誨蒙曰衆寶所藏也獵而有之在我矣歷幹  
辦軍器所國子監書庫官書庫在十年外喜曰積是歲月足以寧吾親矣期至  
猶不忍行參政曰不然今二孫已長家問且莫及而爾兄弟結綬京師吾意其

少慰公謝勉出監六部門軍器監主簿太府丞太宗正丞再知嚴州不行初公在軍器監言造會子者二百人放作則散處於外稍久則兌賣名役恣其自便誨其爲姦宜置營區聚老而後代死而後收及外府又言四弊戮僞造一也立營房二也紙綱出峽重其防禁無使售易三也暫止印造或出內庫錢收換椿官以救低折之害四也於時會子法未敝而公之策如此改知徽州尋提舉浙東常平會稽督零稅急械繫滿府縣值公攝帥盡釋之士民歌呼义手至額曰真李參政兒也以兵部郎召樞密都承旨蘇師旦倚權利傾天下士公獨不往師旦病之或曰可餌而致也遷樞密院檢詳文字公固不往晨入局會揖而已師旦怒愬於專國者徙將作監既而自爲節度使賀客成市公又不往專國者奇之曰是負氣有守可尙已遷太府少卿公建言治世黜虛而務實今挾虛競僞者醞成北伐之議邊事旣壞矣尙多夸詡以悞朝聽詆虜則以強爲弱以銳爲怯譽己則以無爲有以少爲多上玩下怠施置莽鹵恐禍不可測願親札邊臣毋得以不根無實之語輕輒來上他日白事宰相又面諭之於是專國者亦

怒公因力請外除直寶謨閣福建運判在職二年孳孳爲民蘇謙者建之兇豪兵與席隅官勢以殺人取賕賂屢移獄矣言路有爲道地者使刑部諭公以建儲赦貸之公曰隅官監臨也受財枉法也庸可赦乎不許刑部吏朱書符端曰臺諫意也勿誤公大駭亟具奏爲吏借臺諫以令者舉朝壯其爲竟投謙嶺外而召公還然卒排笮誣譖寢其命公殊自喜別墅有寒泉脩竹留居之以嘉定二年十一月二日卒年五十八三年九月十一日葬餘杭縣茅山夫人施氏潘氏贈宜人四子曰仁本通直郎新知南陵縣曰仁方承事郎前知仁和縣曰仁表迪功郎新海鹽主簿曰仁元通仕郎五女迪功郎前烏程主簿張端節從政郎新嘉興府司法余察迪功郎吉州龍泉主簿張恢承務郎監江東總領所藥局蔣杞爲其壻孫曰熙曰勳公文出新意作生語綴密簡雅無刻露之態四六絕去數百年體裁切對順偶有若自然圓行方止不拘定質詩騷尤清婉其餘弄筆率就皆有義趣讀者雖貴珍莫能定其價而公亦深自積藏雖子弟不覲也遠齋公燕居之齋也故公自記之其言曰心遠物也利害得喪欲惡若一

塵之起其前遠者隔焉心蓋近物爾吾懼其然也揮斥剔抉使夫塵者不立而吾之遠者日充充而至於無所終極方寸之微而有不可勝用矣嗟夫人常求所以悅是心者未嘗知所以病是心者方將與利害得喪欲惡角立而並行且竭力以奉之不暇焉有以是爲塵而隔吾遠哉又烏有揮斥剔抉使是塵之不立而充吾遠也然則公能求所以病是心者而治之矣其能難進其能易退其立德深其去姦果仰能承其先俯能訓其後非偶然致者文字之工不足爲公道也銘曰

彼門地者發身之秒彼詞華者得名之小賢哉兼善清明自躬養心有本聚學有宗其在本朝傑出特立其在四方護善鉏惡豈不富貴視若一塵我爲悚然思見其人苕溪千里堪其止止我不見兮庶幾在此

水心文集卷之二十

墓誌銘

文林郎前祕書省正字周君南仲墓誌銘

君名南字南仲對紹熙元年進士策祕自宮掖俚及塵肆略無不言其最切於世論者曰陛下聰明爲小人蔽蒙甚有三一曰道學二曰朋黨三曰皇極夫仁義禮樂是爲道問辯講習是爲學人有不知學學有不聞道皆棄材也古人同天下而爲善故得謂之道學名之至美者也小夫譖人不能爲善而惡其異己於是反而攻之而曰此天下之惡名也陛下入其說而抱材負學之士以道學棄之矣惡名旣立爭爲畏避遷就迎合掃跡滅影不勝衆矣小夫譖人猶不已又取其不應和少罵譏者亦例嫌之曰我則彼毀爾奚默焉是與道學相爲黨爾陛下又入其說而中立不倚之士以朋黨不用矣舉國中之士不陷於道學則困於朋黨矣唯其不能可否而自爲智無所執守而自爲賢然後竊箕子公平正直之說爲庸人自便之地而建皇極之論起矣夫箕子所謂有爲有猷有

守是有材有道有操執之人也汝則念之斯須不可忘也不協於極而亦受之謂其雖有偏而終有用亦當收拾而成就之也今所謂道學朋黨者正皇極所用之人也奈何棄天下之有材有道有操執者取其庸人外若無過中實姦罔者而用之而謂之建皇極哉其故無他闕冗適尊異凡庸當奮與天下之大禍始於道學而終於皇極矣考官奏擬第一中語不用教授池州熙寧後道學始盛而攻短者亦繼出靳侮交雜意極鄙悖士不敢辯也獨君能辯之至謂道學朋黨卽皇極所用之人則自箕子以來爲之訓解者未有及君此言也時天下益勸攻道學新昌黃文叔名忤要地御史遂指爲魁傑而君其壻也罷教授差常州推官父卒不行主管吏部架閣文字開禧二年下詔訟虜曰讎恥累世矣卽日討伐調度洶洶君賤不及議常憂迫不自安坐起顛倒樞密院開機速房以朝士掌之兵事密畫皆使論定而後上君與選焉大恐辭曰吾方以先事造兵爲發狂必死之藥敢嚮邇乎朝廷不能奪與議併寢因求補外幹辦浙東常平司明年召試館職虜留兵濠州江淮未靜君言善爲國者不執理以強勢之



所難常順勢以伸理之所易今日之急復和而已寧使力尙有餘而惜和之早毋使力已不足而恨和之遲也天下繁委當付俊傑今廟堂無能盡出胥吏蒼頭盧兒干政接踵滲酒霍肉瀾翻其家根本大壞矣於是擅事者怒悔召君謾除正字趙幾道爲太常丞論成肅后山陵不當過江斥次且逐君母卒得止再除正字御史劾嘗以田賂蘇師旦遽罷師旦田入安邊庫賂之主名故在也嘉定六年朝廷以近比繇館學牽復者與幹官使其友壻訊君君要誓不願詞甚苦故命久不下九月晦驟食蟹下利上喘閏月朔卒年五十五年二月某日葬穹窿山職鵬君耽書喜誦出於天性十五六時視吳下問學止科舉心陋之一往旬日已棄去歲五易師一易師爲傾動相播告擯絕旣從余初若無所論質已而耳改目化氣竦神涌古今事物錯落高下不以涯量頓悟捷得受之若驚行之若疑標樹山嶽之上越軼風霆之外故朋昔類望塵不及皆靡弛而逝矣常以世道興廢爲己重負一飯不顧私憂時如家憂人如身人情多玩忽見事君悻心恒慮覩緩知亟老校小史引坐深語所知往往非人所能知也文詞

撥去今作脫換騷雅欲以力自成家而瓌麗精切達於時用亦人所不及也端行拱立尺寸程準門內順穆廉節整飭自賜第授文林郎終身不進官兩爲館職數月止旣絕意屏坐衣食弊惡雞鳴挾書盡夜分皆憶念上口數千載未了事皆欲正定名章偉著皆欲銓品異聞逸傳皆欲論述曰此所以遺吾老俟吾死也嗚呼材之難也俗壞教失苟得一二以自好故成之難成矣不用矣不愜不愜樂而不悶尤難也然則老其不遇之年伸其不用之業疑若可矣而猶不然何哉君吳縣人曾祖昇祖困父安道承奉郎娶黃氏子深源嘉興縣丞乙丑進士也浚源澄源女嫁湖南機宜衛樸次未行孫曰某曰某始余屢扳君使究其論君畏浙江之濤馮翁之蠹屢辭焉曰未暇也嗟夫余固囑累子而反累余

## 銘曰

孰材多而賤兮超昊蒼跨鸞龍曠一世而僅逢孰材少而貴兮冒欽蓋沒塵泥困百謫而窮凶雖遠求而莫致常近獲而不容抱和璧以並剛扣牛鐸而偏聾晉楚非曾參之對兮顏回豈與松喬乎比崇夕余箱兮納職臨之月朝余臚兮

進穹窿之風悲子不可見兮余將曷從

寶謨閣直學士贈光祿大夫劉公墓誌銘

公諱穎字公寶衢州西安人曾祖瑄祖持右迪功郎父蘊贈正議大夫公紹興丁丑中進士第主溧陽縣簿虜窺江退州索民租未入者公白留守虜事急民不勝病矣請因以賜民張丞相悟謝曰慮不及此卽奏閣免絲是知公令其子棊與游教授全州勤苦自力率諸生同夜旦湖湘化之士人增倍改官知鉛山縣陳丞相訝曰薄職事官耶公謝以當應新制而已正議卒知常熟縣素號繁難前後健者盛氣鉏刻顧不克公降心條理更以治稱簽判潭州帥負其能僚吏憚懼公約以中道常屈而改爲及陳峒反所禽滅多公計策旣入朝乃言簽判功在臣上臣實愧之召監進奏院遷太常寺主簿遷丞兼兵部郎官監司皆上自選提舉浙西常平茶鹽事公言特備糴本盡廢圍田者再未及用就遷提刑禁州縣毋得法外自恣間詣獄察不應繫數十爲曹縱遣之百姓走愬道相屬權勢交恨御史遂以介僻劾公罷久之御史去除江西轉運判官德化縣田

逃徙大半守乞免稅至五六不報公以見種實稅均其荒萊民願佃者第減之上供自若而逃田盡復屬州緣紹熙登極科進奉千餘公亟奏黜而薦其名士潔廉者十數除直祕閣淮東運副初水敗楚州城幫修久未定總領扳公預議公接伴虜生辰入對言劉超欲壞舊城改築國家何故捐數百萬緡爲軍帥幸賞地可一語決也光宗從之城完牢至今除戶部郎中淮東總領務場以額鈔抵賞陰失餉計積二十年無知者公隱核得之度賣絕增餉一年還司農少卿總領淮西先是有總領自乞爲都釀抱淨息而私其贏後稍益侵反以大軍錢佐之邀糴徧江淮遷復歲月回易如負販王人之體盡矣公在事雖無幾名實有辨義利判然斥部內竊借總司爲姦者其人大吏難動搖者也太夫人董氏卒除直寶謨閣江東運副又知平江府皆未上除宗正少卿起居郎實錄院檢討官權戶部侍郎同修撰塲生於頰提舉興國宮除集英殿修撰知寧國府改知紹興府越東西都而彫郡也數旱災然衆欲所贖念不暇卹公歎曰民何罪吾不忍用太守禮食其粟過矣浮餽妄請皆不與又乞鬻僧道止添差曰庶幾

寬之遽差知平江府公徑歸復提舉興國宮知泉州泉土富樂其暴桀椎埋羣  
偷而衆奪者悉株連送遠地則一以靜鎮事從其俗人尤愛之蕃舶至舊與提  
舉閱視公不往第遣職官喻曰貨不汝買也待制華文閣次子正學死復乞興  
國而歸公歷官大小各有意隨其病傷鍼石施焉蘇愈而止不執寬猛之偏術  
抑人以徇己也余所述近是矣立朝進退必以義立德所尙陳說正理而扶救  
之不懷避就之淺心貶己以合時也孝宗時博謀盡下人臣爭承風自獻公乃  
奏今日之失在輕聽人言而已昔之施爲今復棄置損威德矣上旣優侍三衙  
與執政鈞禮公又言兵權惡專況今之將帥何足稱頭指哉光宗時論人主難  
克而易流者四曰逸豫無節賜予無度儒臣易疎近倖易昵也慶元初始得親  
近卽疏言二三執政非所謂坐而論道耶致今日之治要須深講今不過尋常  
文書肯首而退爾大官大職安得輕授冗兵冗吏所宜痛減橫恩濫賞不可輒  
啓巧請他比不可曲從皆今日大患也又言修德莫先於務學學之道存在己  
不息之誠極取人爲善之益者也夫易貴朋友之講習禮戒獨學之寡陋今勸

講久廢矣方是時風俗一變其正邪消長而好惡向背之際有甚難言者公獨謂黨與傾擠報復迭起願陛下御之以道容之以德不然元祐崇觀可監也且今日已爾又將如後世何公立朝論事落落多此類余所謂不貶己以合時者也公自泉歸而與國滿四年不再請有爲言而與者辭不獲然後受已而復請老進敷文閣待制致仕嘉定元年除刑部侍郎公曰臣已得謝矣惟陛下哀憐俾全末路進龍圖閣觀數月復以公知婺州公又曰若強臣此行狼狽殞越身無處所有虧名義取誚士論上知不可奪祿宮觀者再又請老以寶謨閣直學士致仕嘉定六年三月二十七日鄉晨坐索湯盥潔而終年七十八贈光祿大夫碩人楊氏先公四年卒三子曰強學奉議郎主管仙都觀曰正學宣義郎曰志學宣教郎知仙居縣三女婿曰承事郎華亭知縣陸三省進士徐冲通直郎蕭山縣丞余岡孫男六常道迪功郎監車輅院常德從事郎晉陵縣尉常武迪功郎監紹興府都稅院常寧常明常先登仕郎孫女五婿曰將仕郎徐士廉承事郎趙與懃進士毛用之潘自楚曾孫男三女二十二二月壬寅葬公於靖安

鄉巖山余既錄公終始大節而又知其自少年高識特立無倚附陳應求劉共甫名公卿也挽致不得寧甘服州縣其出浙西連七八外徙十餘年有以淹速訊之公笑謝曰吾所欲也其在侍從而故與周旋傾吐無間者方居中用事提將相與人如反手然公從是絕矣常言士以不辱身爲重用捨命也其爲少宗正而趙丞相適歸相遇於廢寺泥雨不能伸足但僧床立語曰寄謝余參政某雖去而人材猶在朝廷幸善待之公曰相公人材卽參政人材也使果賢參政之責非宰相之憂也揖而別余公繼相卒於善人多所全佑公助之也及後落公致仕而同時被落者皆已起爲執政獨公不顧詞婉而正志恬而安嗚呼斯完矣夫銘曰

公先幽潛始自正議隆興初元匭書千至天子驚嗟曰纔一二公時已仕德器早成物纘兼融理冲獨榮前方後方不斲而行勢有險夷情有戚休畀我百爲從容並酬階卿級侯衆俯僂之峙而莫前公則戶之始居疊石巖開洞劃九仙爛柯今古一弈後依菱塘陂斜浦橫欵乃其歌五湖夜明有芝九折有松千尺

雲藏霧縹以庇茲刻

故吏部侍郎劉公墓誌銘

開禧二年冬虜舉國入寇蜀楚淮徐同日被兵上詔邊臣謹城壁縱民徙內地虜求戰不許鹵掠無所獲既而大雪數尺凍飢太半死皆引去獨留數千人於濠州以綴和明年六月劉公退翁爲賀金國生辰使虜論議往返未決公至揚州詔還潤州以俟自兵起鹽商不敢行傳言虜且犯通泰而提舉官相繼遜逸鹽利大乏朝廷患之卽京口用公提舉淮東常平鹽事公曰鹽在北而移司於南異日虜不至使剽奪竊窺吾之責也遂渡江益貸亭戶鹽既增積舟相接數千里賣盡復其舊又明年改嘉定元年就爲轉運判官虜卒請和公得運司留錢十九千護視通問賀生辰使各一又自爲接送伴遺留使三年爲兩浙轉運判官四年爲副使自浙徂淮凡北使送迎之事經公裁定後皆爲成式州縣無橫費暴役兩運司各有贏財蓋五六年中自虜約和而公以選居其間至于約成而能堅且久其所以阜財寬民上下之情交孚而綏懷安集之政行焉公姓



劉氏諱彌正莆田人也繇進士第歷潮州司戶參軍監鎮江府權貨務茶場知撫州臨川縣入爲諸司糧料院太常寺主簿樞密院編修官太常丞兼左曹郎官其提舉轉運淮東也召爲吏部員外郎兼考功右司進左司郎中以直寶謨閣爲運判遂自副使爲太常少卿國史院編修實錄院檢討官除起居舍人遷郎遂爲吏部侍郎公方靜簡質與人不苟立同異至臨事鯁峭除民疾痛剛果立發必達其志而後已在臨川守以畸零稅迫縣公故爲寬期曰此於法不當徵也守怒甚荷邑胥項廷詬公公曰以喜怒罪令則可然畸零稅不可得也歲旱按田傷者自蠲之端午守戒縣取鼓以節渡者且檄公至其所曰無令敢譁公曰民無鼓而知縣有公事不可往往尉職爾其在朝而陳丞相自強愎公不附己故出以使虜又疑虜復犯淮故就用爲提鹽皆欲以危地陷公也公旣盡通鹽利則力繩武將之兼州者使奉法奏罷軍功雜流之爲縣者悉注文臣賑業其部之貧民錢米各有差甚至真州官私屋初立坊巷街始具城樓櫓皆新成取廣儲富安倉稻麥以食餓羸淮東漸如平時矣自渡江而帥漕爲應辦官

儒生節士苦不得行意公既過清無敢以私問者事關內臣未嘗與相見爨不  
 宿設門衛寂然公之始入朝兵禍起有萌擅國者名使議鐵錢實以邊事付之  
 公行兩淮久而後返言無故而先發天理不順無豫而輕舉人謀不從擅國者  
 怒促進師既皆潰敗公又言今虜頓兵要我復和急之權則在人矣緩敵莫難  
 於財若今任帥守監司管軍以上貲豪其地者皆有以佐軍須而宮掖之奉吏  
 胥蠹食悉加裁擢使國用未甚屈則虜可力持而計可徐定也其論先後之序  
 如此在太常言初相光宗周必大留正也及升祔獨葛郊已死遂得配食今二  
 臣亡矣請別議應配者詔方下其事公爲侍郎一月卽以病自乞不許滿三月  
 累疏猶不許最後許以職守郡然冀公復瘳也猶不出命遂以七月六日卒年  
 五十七嘉定六年也七年三月歸葬於城南三里寶澗原前夫人曰方氏今夫  
 人曰林氏子四人曰克莊迪功郎隆興府靖安縣主簿曰克遜曰克剛方以公  
 遺恩任之曰克永女三人已嫁者鄉貢進士方濯其壻也初公父名夙仕至著  
 作郎著作第名朔祕書省正字余嘗敘其人在名世之目忽忽未用死公幼率

諸弟勤苦緝故業貧不能具膏火旁嫗夜績者光射公牖輒攜書就之後皆中  
第天下謂能繼其父矣公教在事內故鄙事亦勉志在事外故雅道不廢介而  
容物故不知者不忌密而與善故知者依爲重登侍從淺其事未著道未伸也  
然推其已行可以信其未行迹其不爲可以任其必爲也有國者未嘗不欲得  
善人之用修而至於善者未嘗不欲爲世用然公之二父與弟皆不及用公將  
用矣而不究此勢之難合而可爲天下哀之也銘曰

惟墓有勒惟賢是記或一已多或絕不值猗公之家我銘者四皆偉然哉可詔  
後世

邵子文墓誌銘

君名持正字子文温州平陽人少有當世志用再試禮部不得第受父致仕恩  
監台州路橋鎮行在臨平酒庫又以不礙格薦送者再亦不及官至成忠郎而  
卒年四十九葬於擘山夫人陳氏子曰儒珍葬近十年儒珍請余銘入九至不  
已君所歷官微事又淺無足載者然余初有學舍而君在衆中神暇語簡不輕

變聲色人蓋已異之訊其業則文典而瞻尤善以理折衆說故多得譽於朋友後余行四方而君亦在焉則士大夫重其能歌詩工四六雅安異同無寒士態疑情滯慮參論平處中利害之實所至皆解榻延佇傾待之出而仕居監當下列人謂君將不喜不惟不喜將不能也而君整飭勤瘁甚宜其官於是又皆曰是資軟細而耐纒澁當無施不可故雖公卿貴人亦往往相爲引重不少矣士方沉藏汨沒固無以異於庸人幸而暴耀震顯建功垂閥操筆不勝記標於竹帛爛然光榮豈其所素有哉以君之沉藏汨沒而自朋友士大夫至於公卿貴人皆能知君如此乃其所素有也然不幸而終不暴耀震顯使操筆者遂無以記此固余之所爲悲而儒珍之所爲殷勤力請而不已也然則雖不暴耀震顯而其所素有者固在矣君父名叔豹嘗監岱山鹽余爲銘者也銘曰  
嗟乎子文四得解爲上首晚益銳竟不偶勿以所無廢其所有

虞夫人墓誌銘

夫人虞氏越山陰人父手雕北辰像事之祝曰必求九天慧女已而夫人生英

悟夙成勁畫麗語不學而能詩書古文有若素習既歸其夫則屏抑聰明不使  
街露曰以文成名子之責也我無預焉凡一家蠱重晝夜辛苦無所厭忽而高  
筆雅韻常在事外自舅姑叔季內外親戚皆言是嫂以賢有識起吾宗不以材  
稱也夫死夫人焚約棄債自治瑩宅據岡阜之宜合寬儉之中人尤以爲能而  
益趣其子於學義曰爾未解無庸他質則爲辯說袞袞如發機中的焉及子純  
賜進士第一人不數年至兩制封夫人爲太碩人夫人無喜色後乃連外補衆  
又歎其遲莫落拓夫人亦無愠容常曰吾憂吾兒不能及古人爾他尙何覲嘉  
定五年夫人從其子守温州明簡靜恕能消弭大鬪使之輕微郡人甚愛太守  
且愛夫人曰母之教也夫人亦天性有恩意聞外杖箠聲輒請入戒曰錯打人  
乎故人愈愛之如其母云六年嫠女幼子思慕涕泣自越來迎夫人憐之使君  
不能止郡人以爲大戚曰草樹凍枯天風淒然而吾母遠道得無霜露之感於  
是使君徬徨乞歸未聽以十二月二十三日卒年七十七年二月二十日從  
夫葬山陰縣丞務鄉道木原三子子純中大夫右文殿修撰子英子彥一女嫁

坑冶司幹官趙公珏孫曰幼成寄子蘇老鼎孫嫌孫長孫碩老昌孫申孫龍孫  
良孫女曰不惜滿女余每患婦女門內常行殆不足銘若夫人以文字異質立  
其家聲在窮達無變志是可述已銘曰

九天下兮遊人間裾襪襪兮珮珊珊悲壽盡兮復來還莽故迹兮留空山

故禮部尙書龍圖閣學士黃公墓誌銘

公諱度字文叔越新昌人曾祖巽祖惠之父仁靜朝奉大夫致仕上爲光宗壽  
特賜大夫紫衣金魚公隆興元年中進士第任瑞安縣尉教授處州母潘夫人  
卒教授隆興府改平江府知嘉興縣召監登聞鼓院國子監主簿公志在經世  
而以學爲本學終其身不私己見爲足不名一家有書詩五十卷周禮五卷得  
義理所安爲多諸儒罕能過也史欲抑僭竊存大分別著編年不用前史法至  
於天文地理今人以爲不必講井田兵法今人講而不足行者公能使文與事  
會卽近驗遠可以據依無昔人迂陋牽合之病也學旣成轉側州縣久默默無  
所發及是輪當面對奏言漢唐英主遭時雖異各競欲爲之心歷歲不渝終獲

已成之效陛下卽位三年矣羣臣猶未喻上志也則豈能以事應陛下哉臣熟觀世故惟養兵爲大患救患之策幸使民屯田陰復府衛以銷今之募兵陛下欲爲之初無以過此又言經筵止讀通鑒寶訓而李燾長編本朝六七大節目本末所係願加考詳上欣然取長編付講讀官天子旣得聞兵數與費啣啣歎息亟下公具屯田府衛十六篇上之會服藥不及進御而經筵以爲長編文字多亦止然繇是知公稍遷丞紹熙四年九月遷監察御史蜀將吳挺死公建論曰國家徒倚世將扞虜而不爲蜀慮叛臣歲舉緡錢四千餘萬邈流而運名曰魏邊寶富吳氏民力盡矣成都非用武國本賴梓潼號東西川劍閣天險漢中興勢蔽遮於外昔人守蜀之常也今內無一兵若吳氏南指兩川豈朝廷有區區制置使何足抗哉天幸挺忽死子弟未有異望急合興利爲一稍徙其兵以實兩川罷制置令梓潼兼領則魏運省而民力可少寬於是上反復語蜀事至日旰遂以張詔爲興州都統制而合興利分東西川執政莫敢任責後挺子曦復歸興州竟以蜀叛宣撫制置失守棄地而去皆如公言紹熙二年光宗始以

疾不過重華宮公爲監丞上書切諫四五年疾甚旣爲御史連疏極諫上將令右丞相葛郊調護孝宗而後朝郊不以爲誠也公因劾郊以諫又言太白晝見犯心月犯天關熒惑勾陳行入太微其占爲亂兵入宮以諫旣不聽累乞罷去又言臣有父年垂八十不能親養奈何以空言感悟陛下且乞出國門待罪而諫皆不聽又與臺諫官合班對延和殿彈中官陳源楊舜卿等罪大於李輔國公最後口陳數千言曰孔子稱天下有道則庶人不議夫不言公卿大夫不議而言庶人不議何也人主有過公卿大夫諫而改則過不彰庶人奚議焉諫而不改失不可蓋使閭巷小人皆得妄議紛然亂生故勝廣黃巢之流議於下國皆隨以亡今天下無不議聖德臣甚危之上莊而不愠也然猶不聽孝宗崩今上禫於重華官詔復爲御史如故遷右正言知閣韓侂胄驟竊柄威福浸廣意所好惡盡以御筆行之公具論其姦有日矣而御筆出公直顯謨閣知平江府公言御筆蔡京所以亂天下也今太上猶未得見表章不通大駕空返歲饑八九以上盜賊已作餒殍滿道此爲何時而容侂胄於其間設御筆逐諫官使俛



首去不得效一言乎固辭或謂天下方患苦侂胄儻遂因公請與節度使放之外祠禍幾可弭中書知力不敵聽以冲佑祿歸養俄知婺州坐不發蘭溪知縣贓罪降職罷自是綱紀一變大權皆侂胄有而公爲冲佑觀者六然侂胄素敬公不敢害也起知泉州公言大夫年八十六矣不當仕直寶文閣復爲冲佑觀旣殺侂胄召用舊人除公太常少卿吏部侍郎公屢移疾以脩撰知福州又與待制上親批授之知建康府兼制置江淮公言兵甚致災殍餘生盜皆不安易動之形也昔方臘反雖卽滅而天下之勢遂動中國繇此不能立今日之急危當使安動當使止上然之賜帶而行公正月至金陵盡四月錢米所活百餘萬口除見稅二十餘萬夜劫城東南立就擒而橫山鬱山賊皆奔散公奏赦之境內奠枕民畫像祠公家爲香火焉時盜起鹽城官軍奔潰踰射陽攻海陵越入天長絕運道將迸之濠壽公戍定遠扼賊西路給淮東鹽司糧仗募士鑿擊遂降卞整得胡海首以獻招其歸業九萬家初避虜之民聚於淮西坐而仰食十萬人及刺爲武定軍猶三萬而巢縣忠勇滁州敢勇督府效用亦數千人公數

曰使爲總領患未已而淮人終不安者此軍也因其思歸悉散遣之公旣制置其大事而數路中奏報緩急雖小事亦應繩墨薦材良逐貪懦比三年江淮稱治暇日作冶城樓廟祀東晉君臣存江左遺迹夜引賓佐質難經義得新說披衣排戶以告爲寶謨閣直學士入爲禮部尙書天下意公嚮用矣公自以年愈高累數月乞告不朝會或一出輒復謝病請去不已遂以煥章閣學士知隆興府卽日歸越提舉萬壽宮嘉定六年十月己酉薨年七十六始公以府衛蜀兵說光宗不用後爲上言今吳曦誅矣若遂移關外戍於成都潼川和好成矣若遂舉籍兵減三之一皆已至之機可爲之會也紹興至今三罷兵矣所增之賦皆當斥以還民又言祖宗家法純用儒生更化之要在尊有德其經世大指如此至言侂冑首縛送李全而以泗州五千人還虜皆與時論異又時方爭言淮之城郭可盡築公獨謂役力繁重難支魚貫而守一處失險則連城震動古人城有所不守地有所不爭蓋兵家常勢也訃聞上嗟悼遷學士於龍圖閣加秩中奉大夫而後致仕七年某月日葬於上虞縣鳳凰山碩人洪氏先卒子曰邁

甲辰進士迪功郎鎮江府司戶早卒曰章承奉郎幹辦戶部提領酒庫公事曰  
遵鄉貢進士早卒曰準修職郎丹徒縣丞女之壻曰祕書省正字周南知衢州  
王棐孫曰元真承務郎元護元貺公初入朝五十餘論侂冑廢比再召七十餘  
矣又南走閩東北出金陵數年復召已七十五故已言者不行已行者不盡然  
公晚猶纂易傳未成書前卒數月念得士必三十人乃可爲國用今始五六爾  
病革但却客危坐與章論說終日其不以老退情終始有立增光前人余所畏  
也銘曰

維天降材人有常職非其本源行潦之溢公毗於學生死六籍發舒中和仁政  
義術彼時燠寒流金走石公儼不動內守冲密彼物壯老先銳後屈公常自若  
致虛用實推其所爲思始成卒小猶管晏大可召畢中列三品外倡九牧揣本  
濟末廢百舉一較銖刀者夫豈不足我懷慨然銘以貽則

太學博士王君墓誌銘

君名度字君玉越會稽人曾祖光祖輩父俊民承奉郎少而奇穎再舉於禮部

入太學以上舍賜同出身教授楚真二州不至官君素行孝謹葬俞氏暴露哀毀高原谷汲飪沐不時具忽有泉自側溢役夫謹趣功以速成免喪教授舒州江淮士人零落既聞君講說切理會心坐席皆滿時間值知州通判闕請攝事所治又能厭服衆意人謂君學與材交相發也名聲大震侍從爭薦六部架閣累年不得上後進多欲躡君君閉戶讀書不自言朝廷賢之特用爲太社令遷太學博士嘉定六年閏月四日坐輿中感疾歸而卒年五十七明年十月丙午其夫人董氏子成孫慶孫女已嫁者錢洪魏成之許而未行者貴溪主簿趙希亮國子進士趙汝憲相與奉君喪祔於五雲鄉孫奧瑩成孫以君嘗所對御試策及其自記本末來請銘初將對策問同舍時事所宜言同舍驚搖手曰草茅諸生乍見天子語固有淺深次第何預時事耶君曰不然罷賢良策進士當世要務無不畢陳自熙寧行之矣且釋屨入廣殿一生未前有此而不言異日庸遽得已而同舍竟登甲科君第居下歎曰吾知愛吾君而已豈敢以不樂聞過輕量明主哉顧掩鬱不上達有司罪也至是二十年甫爲博士幾復見天子或

言宰相方知君奚啻一博士而止不幸不及見命也君見已有日不料道何等語以對策時意氣推君所欲言其能不擇淺深次第而盡言之果矣然則不及見天子而不啻一博士者爲君恨當以君將盡吐所欲言而不及見者爲君惜也銘曰

昔子中道我勉而進徐行方軌九折之峻萬鑿一金拱璧其沉孰知我悲刻銘斯陰

水心文集卷之二十



水心文集卷之二十一

墓誌銘

朝請大夫直龍圖閣致仕沈公墓誌銘

嘉定五年三月朏越明日朝請大夫直龍圖閣沈公卒於是宜人強氏歿十三年五子二女子曰燁鄉貢進士焯進武校尉傑從事郎監提領所糴場門燾迪功郎監鎮江府東北較務然免解進士女嫁承直郎扈武者亦已卒次嫁王唐卿十月晦葬公於開元鄉管社山與強氏同藏而使來請銘沈氏自漢以後冠冕名聞之盛代不絕於烏程公六世祖遇始別居常州至曾祖宗道猶未能以仕顯至王父復考松年及公皆中進士第復爲朝奉大夫松年登太學爲博士而公教授處州掌刑工部架閣文字國子錄太學博士樞密院編修官兼實錄院檢討官祕書丞著作郎贊讀嘉王府兼兵部郎官遷起居舍人起居郎皆兼侍講有位有賢相繼益章然後無錫之沈始亢其大宗公諱有開字應先少學志其大者張欽夫呂伯恭官京師浙西士不知敬公獨從之薛士隆陳君舉客

於毗陵公又從之心爲範防物爲經制脉理灌輸而不以文字華藻給口耳之  
求人視之憤憤而公陶然有以自樂不顧也蓋晚乃奏上舍名朝廷方選舊人  
使教國子而公在焉竟講下簾重扉深拒未嘗妄請謁留丞相異之喚語揖坐  
常聳聽移日當是時丞相患淳熙末知名士不採察而沉廢於賤冗數年間拔  
用幾盡士懼喜誦說以爲自趙元鎮陳應求纔有此爾丞相既得譽於天下而  
公陰贊密請力尤多天下雖知公助之而莫知其所以進者何人公默不以語  
人雖子弟亦莫知也然不悅者固已忌公及教嘉邸反覆深切尤詳於君子小  
人之際則忌益甚上卽位欲習知國家事故宮僚二三人日再宣引入禁中賜  
坐問民疾苦皆非前例所有絲是忌者合勢相與排公最先罷又以危語中之  
坐廢斥十年公恬不爲動已而稍悔寤使知徽州不得已強起屢求去奉使江  
東迎吏守門迫公行固不往復以知太平州遂乞致仕又幾十年年七十九而  
後卒其居家無酒肴燕舞僮奴衰落終日整坐間行視園中草木所從惟耆年  
久故南北之過賓及有職任於時者皆辭以老病不見也嗟夫士非不欲自賢



也迷謬於趨捨操術之異顛沛於得喪憂樂之殊壯而合老而悖而得其所謂  
賢者鮮矣公學不銜於繁而能守其要及其用也不榮其身而思以畀其徒終  
其老也安以儉退而無累於得三者人之大節而公兼之斯其爲賢也歟銘曰  
蘇常中間季子所國地卑而爲野兮無錫之山繚而特水汙而爲澤兮無錫之  
泉冽而食允矣沈公以配茲德

李宜人鄭氏墓誌銘

天富北監在海玉環島上乾道丙戌秋分月霽民欲解衣宿忽衝風驟雨水暴  
至闔啓膝沒及霽蕩曾至門已溺死如是食頃並海死多數萬人監故千餘家  
市肆皆盡茅葦有無起滅波浪中老子長孫無復安宅四十年濮陽李寬知監  
事民賴其力始就高燥立棟宇坊巷繩引閭伍鱗次旣滿諸司輒留止不得代  
凡六年而監市成略如丙戌前矣噫四十年而後得一監官何好官之難遇歟  
雖好官六年而後集然則以急疾草猝爲功者非虐歟以故李君每來予禮接  
不怠君以其母夫人狀授予銘不辭夫人鄭氏徐州人曾祖僅從祖望之皆有

名先朝至侍從貴人夫曰朝請大夫浙東參議某丞相文定公迪五世孫太子少保東之四世孫既生大家其歸又相門也家法不教而嚴家政不慮而修參議爲奉直子夫人前後事舅姑無違愛子不異庶嫡遇妾媵尤有恩參議沒子孫遵其德貴賤百五十人合堂共食令壹而和職分而同新嵗之郊以爲是北方名族能存其舊風可效而行者也夫人卒年七十五葬從其夫子十人得仕者文宿與寬也孫若曾孫男女壻若羣孫壻又數十人嗚呼可以爲衆矣銘曰其衆則增其賢必升夫人之承嘉定八年二月日

寶謨閣待制知隆興府徐公墓誌銘

公諱誼字子宜一字宏父温州人有徐寅者相王審知寅之孫薄其官遜於平陽自號處士寅以上無世次而處士廟於沙岡爲別祖公二大父仲熙世充考迪哲皆以惠愛稱今江南石馬頭百間其所爲也公貴贈迪哲奉直大夫公登乾道八年進士第教授池州江浙後進負擔來學宰相曰當爲太學得師除博士遷樞密院編修官太常丞天子親政久威柄積上臣下多皇恐願望事惟奉

旨而行公諫曰若是則人主曰聖人臣曰愚陛下誰與共功上色莊改論樂制公對宮亂則荒其君驕商亂則陂其官壞上遽和容受規徐曰卿可謂不以官自惰矣丁奉直憂知徽州光宗內禪公奏三代聖王有至誠而無權術至誠不息則可以達天德矣願陛下守而勿失宰相邀公留公謝曰某方欲勸公去奈何歛縣上妻殺夫以五歲女爲證公疑曰婦人能以一摑致人死乎緩之未覆也旣而實稅於庭死民母及弟在焉乃言我子欠租繫久不勝饑大叫役者批之墮水聾耳宿昔死矣然後保正伏罪併劾受賂吏闔州感動所謂實稅者婺源戶餘三萬而逃絕六千其新安還朱鄉戶稅役十無二三公始令民以千照造簿自實其稅應者蟻集婺源諸大豪不喜謗於朝移提舉浙西公請訖籍而行不聽公在徽常單行入村落除其賦萬緡山谷叟老具鼓笛侑酒送公泣而別過朝疏兵民十二事持不下留丞相請付外上悉鈎摘要語多施行者時方拜右丞相將引公自助延納甚密公曰上聖質寬平相公宜匪躬協贊若意向有偏禍不旋踵揖而起浙西水利尤重公論其切於時者曰昔下流不疏而水

上溢故鑿直曲港還三江故道開宜興百瀆所以順導下流也惟高亢田徑乃  
 瀦堰之爾昔之言水如單鍔邾豈皆是也今開吳松江下流與宜興瀆屬之海  
 者無慮數十百所異時浦港磬折以趨海今沂浦之民多取徑直決蘇湖常秀  
 舊爲澤國比年雨或後至種且不入蓋圍田衆而疏導多也小人見利不畏其  
 害圍於淺水既爲高田圍於菱蕩既爲稻田二俱不已復有下脚始之重陂大  
 半爲土始之良田背水自曬十日不雨農廢作業然且承用舊說又將疏之失  
 利害之實矣故舊田溝澮當濬治圍田下脚無輒開已開未填當捺合今之言  
 水者能行是三說則高原舊田還爲衍沃而農不病矣入爲吏部郎遷右司左  
 司今上卽位遷檢正中書門下公事兼權刑部侍郎歲不熟半天下宰相以命  
 公吏或夜半攜乞米奏至歛起擁被燭其重輕量分數應之報下未嘗失時刻  
 進權工部侍郎知臨安府公歎曰京師彈壓如傳餐耳況應辦手掬食也首善  
 何所仰請於上曰今鰥寡孤獨夜宿煖堂寒苦而餽錢無所得臣欲度都門外  
 爲八居養院費大不給內帑皆三朝恭儉之積陛下幸圖之上蹙然曰卿言是

也賜賁餘四萬卽相地市木會有御史劉德秀疏罷慶元元年三月也胡紘再  
疏責副團置南安軍移袁婺州嘉泰元年六月始聽自便久之復朝散大夫提  
舉崇道觀二年王師北出以公知江州辭不獲與子渾杖策赴郡虜數道迎拒  
兵壓江漢姦民乘隙謀亂訛言相恐公捕誅首惡字其餓羸恩接賓旅募人於  
浙東部分練習燒塹築城創輕舸船往來捷疾繇夏口而下依公爲強虜旣去  
朝廷是公所爲除集英殿修撰尋待制寶謨閣知建康府兼制置江淮初虜圍  
廬楚不下而歸猶綴濠州以待和時時抄劫與我師遇殺傷相當淮人大驚復  
迸流江南在建康者數十萬皆曰虜再至矣公晝夜拊循益備禦請專扞敵勿  
從中御朝廷疑於和戎弗利亟移知隆興府黑風搖羅孟傳與其叔羅時忿爭  
讎殺湖南抑孟傳而右時孟傳怒殺飛虎親兵以叛禍連江西吉贛四州勞於  
戍守孟傳囚土豪以情愬公且乞降公爲列上曰受降非臣事也顧大計宜聽  
詔許從江西降而公已病旣而賞及兩路公不預也嘉定元年有星隕州之南  
明日七月朔而公卒年六十五年十一月朔葬於鳴山夫人宋氏先公卒二

子冲迪功郎渾將士郎長女嫁西外宗教林士遜次進士章學禮幼未行也公少而異質自然合道天下雖爭爲性命之學然而滯痼於語言播流於偏末多茫昧影響而已及公以悟爲宗縣解昭徹近取日用之內爲學者開示修證所緣至於形廢心死神視氣聽如靜中雷霆冥外朗日無不洗然自以爲有得也前後執政以國事訪公者告之必盡初光宗疾免到重華而日視朝毋改中外交章論切公旣入諫退見宰相淚落曰上慰納從容然目瞪不瞬而意恍惚真病也已盍爲詔四方禱祠郊廟進皇子嘉王參決留丞相未及用逃之徐村上使公諭還浙江亭復其位疾終不愈孝宗崩又不能喪公與少保吳玘議請太皇太后臨朝扶嘉王代祭答羣臣禮幕士取簾幃俟命后自祭奠乃止於是將禫上臨喪未可知也公憂憤嘔泄臥責趙丞相曰自古人臣爲忠則忠爲姦則姦忠姦雜而能濟者未之有也公內雖心惕外欲坐觀非雜之類歟國家存亡在茲一舉趙公問策安在公以知閣門事蔡必勝授之使同爲知閣韓侂胄固請於太皇太后禫之旦嘉王竟立嗚呼當是時謗讟橫流而天下之口不可遏

矣微公定計將使一夫攘袂而趨然則社稷永安而宗廟常尊澤施於今者公之大節不可掩也余觀公忠利慘怛能任大事視人如己本無以取嫉於世而世亦無忌公者獨侏胄旣得志則驕肆公面誨之慚恨故得禍最酷流落十年不復用銘曰

古之聞道以身爲言開乾闔坤圓方各旋後之聞道以言爲身因其己行筆舌之陳人實不弘狹而易安公胡早悟嬰此百難紹熙訶訶天作閔凶舉世驚哀莫敢弭鋒公初何營裂肝碎腦公後何成宗國是保彼譖人者不祀忽諸昇爾枕席詒我泥塗生不求榮死不求諡人臣之義惟以自致鳴山高終風續濤爰居時來助其永號嘉定八年三月□日

中奉大夫尙書工部侍郎曾公墓誌銘

公會姓漸其名字鴻甫建昌南城人曾氏散居江南閩浙仕無不取卿相其別自撫州房居南城者至公會祖處仁祖度始殖殖於學爲儒先生父發用累舉恩監文思院公生未十年徧讀經史默誦左氏能通舉大義筆下語五六十翁

不能爲踰冠三上省以第二人賜及第授承事郎簽書南康軍判官政纖巨一  
佐其守值旱饑沿村勸糶又決獄問囚走旁郡勞苦未嘗辭諸司賴其親已合  
議薦之公遂巡辭曰一路當薦有幾不知求何用我曰名孰先於子公曰刺舉  
不責功實而以名取人縱我急進不愛惜得無反墜棄之乎固辭而免召爲國  
子正遷博士祕書郎實錄檢討官時論者方以道學爲僞攻訕出一口公厭之  
求去得請矣有覺其不可者留於朝遷著作佐郎兼考工郎官求去不已知滁  
州會新立法不更邑不守邊請主管冲佑觀知興化軍將行文思卒初韓侂胄  
陰執國柄宰相以下升黜在手公不往見故御史程松希指罷公至是侂胄自  
爲平章軍國事未畢禫而以祕書丞詔改著作郎兼兵部郎官軍器少監祕書  
少監公以驟遷爲非復求去不許方下詔伐虜直北門者旣辭不就將用公公  
曰吾初不與議必用我卽以自所爲言者具之詔遂寢又將以公檢點樞密院  
機速文字公復力陳不可又寢連求去侂胄雖不樂然極重公遷祕書監兼國  
史編修實錄檢討官兼權中書舍人自侂胄貴臺諫給舍供隸役彈劾封駁皆



具簡請命意所欲者指授行之侂冑殊不以望公有論執卽時止右史陳子耕歸自泉州衆畏其兇險公曰是嘗無故自言爲察官者今地位已高必亢顏據要路肆其噬搏善人無類矣侂冑不敢違爲改一州使去於是女真雖退而濠州屢擾小使議和久不決虜堅責正隆以前禮賂持論者各懷苟且公推行大義載於訓詞扶善警姦得承平與雅之意又爲改定誓書以存舊體俄而侂冑死素抑奪者多收用而趙彥逾亦在中公爭曰彥逾無預世道興衰何爲於此又將籍故宰相陳自強之家公又爭曰國家本忠厚爲德二百餘年矣豈以自強故薄哉時公已病於更改向背之際多不合慨然歎息曰天下事止於是邪遂以親嫌乞免且以病力祈去除權工部侍郎陞史官爲同修撰病遂不愈開禧二年十二月二十九日卒年四十二顧其子曰汝雖貧尙有田宅謹持門戶無因我死乞憐於人嘉定二年二月十八日葬於太平鄉香山夫人汪氏封恭人子曰穎茂承務郎監福州水口鎮曰穎秀修職郎新監紹興府苗米倉曰穎敷早卒女之壻曰衛樛某官幼未行公孚尹明達旣早慧長益貫研古今出其

英華皆有新意方得志於科目不知者以凡人料之謂其馳逐資富貴鮮洪相  
矜伐而已而公謙明無傲世之行簡遠無近俗之名未得不願進暫進輒求退  
處樂而憂遇變而安當慶元嘉泰間朝衣負塗炭之羞而以冰玉自潔青蠅蒙  
樊棘之誚而與鴻鵠偕逝合德引類思深慮長天下以爲賢而宜書死而宜傳  
惟公也銘曰

孰司下人逐死奔生有膏其汙不懼其清是爲鴻甫正性之閑衆攫羣攘舒徐  
其間時雖我昇我不時卽進怯退勇先義後得終於開禧始於慶元吉士庇國  
如珠潤淵日之所杲月之所耀不可蓋藏可以並照香山之岡雲木茫茫其年  
短折其存永長嘉定八年九月日

毛積夫墓誌銘

毛子中字積夫髻髻有傑氣十七入游江淮亂後邸店未復臥起草中時時與  
小寇遇行數千里知形便隄塞涕泣曰管樂不再生耶夜捕鹿迷失道旦見樓  
堞轟然合肥城也值帥方打圍戈甲耀日君薦虎皮道旁燔肉煮葵菜浩歌縱

飲弗爲視帥揖語大驚延上座稍長親師友學習今古諸生不能言者盡爲言之復出沔鄂得賢豪名世士識別相與懽甚因留門下終身所至專席高論袞袞無對怒馬獨出不施鞍勒或入酒壚憑高悲嘯衆共怪不敢近荒旅窮肆飯客常滿或閉門袖手借書危讀經旬月無不通人畏其博而專也然不得騁於科舉禮部嘗欲第其文又議不合而止余屢諷君年過五十矣氣憤將衰血燥將臞宜返耕築室以順天命無徒取俗子贅疣也君怏怏不自喜尙行游無怠至踰六十度決不偶矣始棄去蔽長松吟小山招隱諸詞哀憤激烈作振衣亭請余記未畢而病嘉定八年五月二十一日以書來曰某自量不在友朋下幸賜之銘抑揚咏歎之死不恨矣其明日卒嗚呼人之所長世固不易知君之所有人亦不能察也然使其當蹉跎之年而與之以奮迅之日則必損奇特之行而爲平易之趨矣詎輕測哉所居瑞安深谷號毛家山以毛姓者二千人祖鏗九十三父讓八十六皆篤學好善稱於鄉君自謂壽種故其規圖常寬遠若有待然纔六十五娶張氏正而婉生四子允兌充充二女輯輔再娶康氏一子曰

應早天九年某月日葬瑞峯山廣度寺尤來速銘予老憤憤下筆未數行耳如附蝸頭眩轉不自支其於抑揚咏歎之意蓋微矣故所述僅如此然可以觀其略也銘曰

不設志以減命不厚生而薄性古之人哉嘉定八年九月日

徐文淵墓誌銘

君名璣字文淵任主建安簿麻溪峒民業鑄兵鬻鹽者官窮治羣捕因相聚爲逆多殺傷官軍州恐以君將而往君不用衆但命土人持榜告諭皆散去罪止三人監造貢茶其長欲取於數外君正色曰此人主所以薦天地宗廟非臣下所宜得移永州司理兵官大執平民爲賊冀以成賞君明其無罪盡釋之丞龍溪縣城旁陂舊稱澗萬頃豪黨私以爲田陂浸壞君旣按視卽疏鑿如舊規移武當令改長泰令未至官嘉定七年十月二十日卒年五十三初唐詩廢久君與其友徐照翁卷趙師秀議曰昔人以浮聲切響單字隻句計巧拙蓋風騷之至精也近世乃連篇累牘汗漫而無禁豈能名家哉四人之語遂極其工而唐

詩繇此復行矣君每爲余評詩及他文字高者迥出深者寂入鬱流瓚中神洞  
形外余輒俛仰終日不知所言然則所謂專固而狹陋者殆未足以譏唐人也  
得魏人單煒教書法心悟所以然無一食去紙筆暮年書稍近蘭亭余謂君當  
自成體何必蘭亭也君曰不然天下之書篆籀隸楷皆一法法備而力到皆一  
體其不能爲蘭亭者未到爾非自成體也此論余尤駭之君與余游最早余衰  
甚朋曹益落君將請於朝棄長泰終從余未及而死垂絕忽長數言爭爭者數  
聲其妹撫之曰何爭張其目視曰天爭妹又曰天何爭復力疾大聲曰爭名也  
遂卒嗟夫君之志固遠於利矣豈以名未就而有不足耶徐氏自君曾祖逢祖  
贈朝議大夫澤爲泉州晉江人皇考潮州太守定始爲温州永嘉人君娶劉氏  
子曰鼎國子學生曰呂八年十月十二日葬建牙鄉郭溪銘曰  
如是而足以名歟則所名何止於此如是而不足以名歟則古之爲名寡矣嗚  
呼文淵其視斯銘余之所傳天亦不爭嘉定八年九月日

故通直郎清流知縣何君墓誌銘

何君名淪字叔禹處州龍泉人其爲南城簿明州造船場皆以憂不任事後自  
温州司理紹興府比較務六年而用薦者知清流縣開禧三年八月十五日卒  
於官年五十六先是夫人富氏歿三年矣嘉定元年十二月十九日合葬於北  
里山子一人曰處權轉運司發解進士女之夫曰張希顏君門地貴重蓋太傅  
清源郡王執中曾孫徽猷閣待制志同之孫也父佃官差減猶奉直大夫然君  
自待如寒人單士未嘗以勢加物居官明恕必舉職而不爲苛暴尤恬淡遠於  
聲利羣從多已顯而君故常調泊如也將往清流值淮北旣交兵衆勸無行君  
曰遇患不避義也州檄縣饋軍前獨君能至全椒來安不至也旣而宿壽兩將  
遁走潰卒聚滁河無食譟且亂君以戍兵糧貸之得免虜決逾淮吏焚廩棄積  
而南或又因以爲利君獨攜口券馬草錢五十餘萬歸之總司守怒扣空篋強  
拘之總爲誚論乃已虜退守與郡僚留金陵沙上賣酒不敢返君挺身坐黃悅  
村招散民種稻趨刈麥晝夜暑濕中遂得疾縣人賴君方再造皇恐扶輿醫建  
康冀其愈竟不起哭而去悲夫自復讎之議出余固懇懇論奏謂須家計牢實

彼必不可進而後我可以不退且盟約久定矣必彼先破壞而後我徐應之不然前直掩而較後曲藩牆擾則堂奧搖矣執事者不審輕動妄發未幾勇怯俱弊使据正守義如君之賢者勞苦困極而不得以老死故其喪歸鄉人迎之無親疎貴賤皆霑涕雪泣非特其恩厚素感於人亦以君仕不逢失其常所而痛惜之也嗚呼非有述於後則何以著君之志而塞其子孫之哀宜處權請之勤也銘曰

身都子男兮家相門往而不還兮墮時紛故園有茹兮溪有縉魂乎歸徠兮無怨呻嘉定八年十一月日

林夫人陳氏墓誌銘

夫人陳氏平陽陳營里人嫁同縣林璞二子善補善祇二女壻彭表韓原林君田不盈一頃多萊少熟父母老遜其業而林君晝夜誦書攻文高吟嘯絕不知家事一闕夫人夫人能飾無爲有久而若自然夫之父母安焉其後頽死喪歲惡田且盡猶力課其子學不怠比寡居而病風濕沉廢逾二十年夫人常順

聽無悲戚有勞苦之者欣笑彌日得好語而歸人以爲難當是時善補經營四方傑材偉士無不師友然尙疑信未決獨夫人以其志許之已而善補及進士第教授無爲軍兵亂人相食俟間輒謁告視夫人夫人麾使速去曰汝已出身事君又反顧乎嘉定五年九月某日卒年七十四蓋舅姑夫子不疚其艱而相依以成者固人之常理至於饑羸疾痛不失其善而必與以報者亦天之常道此夫人所以兼得之也夫人並家有鹽亭山阿阜深衍卜者指斗門之北曰是宜冢藏善補稅於官十畝初光孝寺亦佃鹽亭山在斗門之東繇戴家山而北僧以官人所擇必山之勝也因內熱冒爭之曰此吾賜山也旣又曰吾山所至也有司索文書驗視不酬吏取重貨持不肯決僧詛鬼路罵聚刀槊期以死競後二年御史民曹交相趨符移總總常平司定以善補爲直然後十一月初六日葬夫人於山之原嗚呼有是哉夫貲不足以買山而葬於官荒之山此譽士之窮王政所必矜也遁耕織之勞而欲擅山海之富此異端之橫王法所必誅也銘曰



徂徠躬耕葬百喪使皆如此訟何當藝裡而掩孰在亡夫人之歸天與岡嘉定八年十一月日

劉靖君墓誌銘

劉靖君名愚字必明太學釋褐教授江陵府外遷安鄉令乞致仕嘉定八年正月十二日卒明年二月某日葬城北仁塘原君行己恭與人敬節堅而志厲學必是古尤邃講說能自淺入深荆人聞者欣朗開達將校改服以聽在安鄉慈允得民和旁縣自占季年再倍夫繇果求藝皆通方之材非以儒自局也始君甚幼家零落待我而衣食父死伯不弔疑將祔於祖一夕舉其柩他山哀呼僵踣幾不活者數焉遂羸毀終身入太學凡三中上舍積歲月始升名比脫紵袍五十餘矣憂患之味早視衆所甘殆若辛螫余丞相素知君至是且召用澧守蘇若霍諸司楊呂范又爭薦君然自謂逾六十矣髮墮齒折何以驅馳一世竟捨去不顧買宅城南四無垣斬蕭艾數尺嘗展卷長哦醕酒薄羹盎如也垂二十年至八十三而終郡人高其行無不歎惜觀文殿學士何公率嘗同舍故學

徒共謚曰靖君明其無競之德可宗於時歿有以思存有以勸也會法者館學之地也以經任爲限蓋有委心歸計於未滿之先矣未有滅跡絕影於既滿之後也作邑者要路之儲也以改官爲急蓋有因緣屬託於破白之初矣未有逡巡退却於及格之際也雖然道遠俗散而天下無肥遯之士流風所扇既莫不然而君豈異於人哉惟尙往於招徠之不豫故謂之知恥迎受於筋力之當衰故謂之知命此君之所以自安於古人而今人以爲不及也君之九世祖曰存以上柱國自建徙衢爲龍游人號江潭劉傳緒至君雖宦未顯而德皆餘於隱矣兩娶徐氏又繼以留氏子曰克曰凡曰凡女嫁進士應彌明孫四人女孫二人銘曰

量人而退非曰自晦量己而止亦其常理有或爲之有或不能是名靖君子後之稱嘉定八年十月日

鄭景元墓誌銘

景元鄭氏名伯英永嘉人隆興癸未進士甲科滿秀州判官調杭州泉州推官

母老不忍行食嶽廟祿九年終母喪授寧德縣丞福建提刑司幹官猶不行於是六十三矣遂以紹熙三年四月戊午卒十一月壬申葬西山余家奧原上二子爲仁次求仁早夭女嫁蔡幼學李復陳鑑世常病景元負氣不屈折故不用殆豪士哉以余攷之景元信道不苟且寧不用蓋志士歟方秦氏以愚擅國人自識字外不知有學獨景元與其兄推性命微眇酌今古要會師友警策惟統紀不接是憂今天下以學名者皆出其後也其論議憤發筆寬墨餘佞者褻魄貴者奪色豈血氣爲之使哉然則志也非豪也故事第四人與上三人踵躡以進累日月皆至卿相景元恥自言故甘爲選人最後朝廷以幹官者拔滯淹之一門也景元笑曰此冗官爾法當廢省可身踐之乎卒以疾辭夫思其職不利其祿然則志也非豪也自其兄及薛士隆陳君舉擅一世臧否號爲方峻景元不然雖閭巷一介之善甚或輩行絕數等未嘗不委曲外比售其聲名家產無十金僮僕單特賓從晝夜集醵肺烹蛤蜊蔬橡雜陳之急難窘助扁舟徑往夜半扣門攝衣偕出矣景元果豪耶不以富貴適己而以貧賤徇人耶故曰亦志

而已矣始行之游陳鄭間後壻鄭氏景元爲余言參政李泰發之孫委禽焉吾  
顧不敢已而中第今爲臨海丞景元歿二十三年夫人黃氏卒既合葬時行之  
以龍圖閣待制知福州書來曰鄭公遠矣宜於此乎銘夫豪與生盡志死不滅  
立德之本也孔孟所尊也何較遠近哉銘曰

陳代嘗言枉尺直尋孟氏所訶曰有利心嗟乎景元尺何必枉既定之榮矢而  
不往以介責身以通恕人餓於西山草秋木春嘉定八年十一月日

東塘處士墓誌銘

昔平陽陳巖學能造微爲陳君舉徐子宜密授不幸早夭二公哀傷俾余記其  
藏時余自都返繚出荊州芟舍倉卒巖弟志崇蹤跡參訊追及余西山重戴拜  
伏又逼同婺越兩界乃得以竊志崇詞藻精麗從余久每語家人細大輒噤不  
吐余竊怪詰其故則長愾淚落曰吾兄銘而吾父踵逝亦有意於子以吾未與  
士齒也率三歲遲之遲六七而吾老不堪士矣不敢怠不敢請卽死無以見吾  
父嗟夫余文無用於地上矣豈志崇姑欲慰其父兄於地下而然耶君名瑾字

國器繇左廂兵馬使十世爲石床里人床方三尋平如琢相傳古有異人所爲  
飲弈也君軒岸沈雄言動未嘗妄旣苦志不酬右書左琴以善娛樂其行常損  
己益物種植甚遠積累而可稱紀者衆矣然最著者在東塘初縣驛道東北皆  
行水中激淖墊沒數十里晨暝風雨咫尺斷還往北塘合一縣之力間乞丐大  
官歷年多猶未備君獨用一家力栽石取底東達之海閱閩而成堅悍可履甚  
潦不能淫人以爲君德更號曰東塘陳氏余嘗患世之富貴苟自肥於民無毫  
髮利益君雖貧賤不爲身計特作此塘利垂無窮可尙已卒年七十夫人林氏  
先九日卒林氏淑而知禮事姑九十白首盡敬閨房資以爲法志崇第曰德崇  
二壻曰林萃邵持正旣葬君於安仁山二十年而孫男七人皆以長立孫女三  
人其二已嫁而曾孫男女亦三人君嘗以志崇德解恩與修職郎然不足爲君  
道而君亦諱不肯當也故題其墓曰東塘處士而銘之曰  
承於祖而未信付以子而猶疑孫衍曾蕃東塘豈欺嘉定八年十二月日

中大夫直敷文閣兩浙運副趙公墓誌銘

公名善恣字壽卿父不尤知橫州祖士起武義大夫曾祖仲馴開府儀同三司  
繇儀同至太宗四世橫州初入宗學以文占上舍而有武力靖康之難走相州  
與岳飛善聚兵萬人將迎二聖雄張河南北巨盜皆避之曰此小使軍也高宗  
立以衆歸御營復從飛武昌飛死秦檜奪其兵抑守嶺外而歿公孤憤激發痛  
橫州以投筆自控束置袍笏不掛身娶婦清江一月誓之樂清舅家賃僧房業  
舉子夜誦依佛燈或日昃未爨履襪穿垢如是三年得京官往視其妻未及境  
有蕭某官者同宿漫問李通判安耶曰嘻死矣女嫁宗室流浪音信絕數年矣  
公笑因敘本末蕭驚異後公爲郎而蕭位執政爲上言如此知無錫縣丞初有  
印板帳錢吏茫昧不能理欠負十七八公補舊增新常多三四以上知寧德縣  
邑小易治公亦竟歲無所答罰通判臨安府敏絕爲一府冠孝宗知之故令以  
事至殿中者再瞻相良久喜動色擢知秀州金字牌忽夜下上親札曰海鹽地  
高病旱豈有水利可興乎河成至今爲腴田還朝命除郎黃參政不奉詔王丞  
相請與大州知鄂州以嫌改江州始有旨射鐵簾公多與金銀鼓舞將士奏藝

爲諸軍第一除度支郎中侍從夜直上論朝士能否獨稱公材前後十數內出姓名知臨安府大臣猶難之進太府少卿於是上旣欲驟用公而軋於外庭御史遂以爲公罪上怒塗抹其疏幾盡然亦罷公光宗語宰相趙某今安在壽皇所囑付也除提點鑄錢諫官疏復止知徽州庫錢滿溢寄於外廊其歸公使者盡以代諸縣賦移江西運判除直祕閣兩浙運判虜使張汝方暮發京口噉車雲上風挾浪成山且覆且號夜乙丙公擇金山隈處列炬火累百募人鉤其舟浮棧以濟國信吏白例卷當自正門入公叱曰汝欲葬使人魚腹中乃已耶陞直敷文閣副使憲聖后攢宮復土第勞當遷侍郎公已病歎曰吾昔遇孝宗蚤居此矣今夕陽之照爾潤家可也報國乎何有力辭而免慶元四年五月朔卒年五十八八月某日葬明州定海縣太丘鄉啓霞山夫人李氏封齊安郡子曰汝鐸承直郎汝鎔宣教郎知浦江縣汝郊從事郎坑冶司幹官汝鑽高州文學汝嗣從事郎臨海主簿女嫁文林郎錢芄朝散郎知寧國府張忠恕孫男二人孫女四人公爲政速於赴機事常集而無跡期會不迫而信治財以寬民獲貸

放而官有餘資廉儉終身不用公庫物在上前言論率樸透底無枝葉上亦坦  
懷歡笑肝鬲親厚嘗謂公曰周天下事每日須過朕心下一遭留卿相聚正欲  
共此不可遠去也蓋孝宗之有志於治如此用人必親簡雅不任宰相宰相往  
往慚沮曰此何以得進同類亦恥不預輒譏曰此繇某來也雖疑似無實然卓  
然被知於人主者地偪而交踈孤外反甚矣故雖一意保持而不勝百計之排  
斥嗟乎方公盛年使其朋黨比周矯揉以應虛譽則何懼不用而摧殘困折終  
不能有所爲者豈非伸於上而顛屈於下哉其後天子一切恭己以事任其臣  
舉鴈行魚貫以聽而公於是時亦始爲任事者所知然公寧以人主之知受屈  
於永久而不以人臣之知求伸於須臾此余之所以賢公也性專介重執未嘗  
曲己徇物薦士尤謹在兩浙或請薦沈程公以程犯賊不許在江西薦許中應  
李肅皆善士時所謂僞學畏不敢舉者也在秀州黃洽爲中丞薦其所親公聞  
澈浦監鎮趙師石之材而未識也薦而後報曰宜以中丞所親爲後洽大恚故  
迄其去毀公不置嗚呼此又可悲已銘曰



富矣啓霞金碧噉噉四獸維之中可一棺咸曰天造樹以斯原噫余趙公曠度  
逸羣神往無方豈是之墳懿其遺聲以世厥存嘉定九年二月日

水心文集卷之二十一



水心文集卷之二十二

墓誌銘

厲領衛墓誌銘

君初名仲詳後名仲方字約甫有厲文才者婺州東陽人也仕唐爲都督刺史文才四世孫玄爲殿中侍御史其居號御史里乘驄鄉玄之後至君曾祖凝祖邦用皆不仕而父邦俊以君仕贈武義郎君中紹熙元年武舉任侍衛步軍司計議官武學諭閣門舍人副賀生辰者使於虜出知安豐軍復還閣門出知和州王師北討賴其能就權廬州俄召授左領衛中郎將虜內侵朝廷憂在江北令君建康防守虜遁歸復還領衛用御史疏罷主仙都觀又用中司疏降秩徙邵州嘉定五年九月二十五日年五十四卒於邵州九年二孤倬俛始以柩返十二月庚申葬於仁壽鄉鮑莊紙白山始君與余讀書諸生旬沐歲省皆散去君獨閉一室未嘗窺戶並試兩學示若文有餘者博士蔡鎬見而駭曰吾周旋武學歲月多矣未省有如此文字余笑曰此非子所知也已而及第第一人然

自後屢舉進士遂不中其入閣門試而後命蓋天子所以異待武人比於館職被命者以爲榮而領衛尤親近君顧不好特俛仰繫縻其間不欲絕也嘉泰中邊事將動諜妄言虜衰有證宜卽取君在安豐嘗奏淮北饑民扣關求救接初無意也柄臣遽從夜半下其議議者因共指君爲開隙生事語聞四方雖其故友朋及爲士者亦交尤之虜旣卒叛盟而君竟坐貶死嗚呼可哀也已夫縉紳守和親介冑言征伐絲漢已然矣其不能相合而相非至於喧忿詆悖而相加以惡亦其常情無足怪也故季布廷諍欲斬樊將軍而臧宮馬武之請至煩人主諄悉詔諭而後止豈非往事之明戒也哉君爲武人蓋失路誤入爾人猶以故步期君其所以責之者抑所以厚之歟然使君致其壹於進士何患不如武舉所得褒衣大帶掌幄中之論無冒十死九生之危夷俟而訾其缺則人之所以責我者而我反以責人矣不亦又可哀也君勸安豐種桑數十萬株墾田數千頃置歷陽軍實甚衆後人用君所造九牛弩射殺虜驍將於城下又用戰車敗之清水鎮素不識田琳而知其材以告余余爲言於朝使代李爽戍合肥虜

不敢犯來建康也虜屯定山十餘萬君募石斌賢夏侯成再破走之虜留六合  
余趣君解圍料其當自退不亟出兵虜卒去其謀効審的多如此然世人責君  
方深故未暇明其功雖余亦不敢言也斯又重可哀也夫君娶張氏先卒再娶  
同甫陳氏子四人曰倫曰倬皆太學生倫早夭曰俟江西轉運司進士曰合女  
嫁吳瑾承信郎呂珣孫男一人曰簡君母吳夫人惟一子自君之貶常悲思哭  
泣比死哭不絕聲喪還哭之慟以歿噫子祿養而不及終母壽盡而逢其凶若  
夫人與君其又皆可哀也銘曰

嗚呼厲君迪知忱恂百家縱橫六籍輪囷亦既豹變剛柔蔚文曷履虎尾喪其  
匹羣人喜攻瑕天獨與純回祥復亨展也子孫嘉定九年十一月□日

趙孺人墓銘

嘉定九年十二月壬寅趙汝鐸葬其妻樓氏於樂清縣永康鄉崇福山樓氏在  
四明累世貴重孺人父鐸知鄂州從父鑰參知政事皆以文學名當時女兄弟  
百人相視以能相聽以巧功容範節自然應會孺人尤謙敬謹約始歸趙君少

年爲材吏頭角暴起已而久不合退居山窮水絕處慕王霸梁鴻夫婦庚麥秀五噫之歌將遁身遠跡以自娛佚而孺人特喜浮屠道常危坐蔬食食纔半掬滋味甘酸未嘗經口若無饑飽之意家人以爲難且懼其瘠然莫能回也是年八九月有上氣疾醫每煮藥輒靜定寂默藥不果進以是病革索浴洗換新衣提青背子白其姑曰奴死罪不應着此下見先舅然去路別人間浮侈之飾無爲也已丑巳卒二女素孝愛拍肩齧臂振牀哭踊無數久之忽開目曰汝不曉事妨我復起愈危坐誦佛名聲聲相連氣浸劣命所善更迭誦念不已庚寅向曛黑大呼曰彌陀接引可去矣遂絕彌陀者釋氏所言往生西方極樂世界者也嗟夫生固無所來而死亦焉有往哉然自怪奇誕謾之說行於中國聰明豪傑之士畔而從之以彼分別影事之心醉夢沉酣於其間至於生死之際變壞逼迫其不顛沛失據而能全其守者千百而不一見也而孺人顧能之何哉豈古人所謂恆德之貞婦人之吉者特其學之異而然歟傳曰人死斯惡之矣無能也斯倍之矣君悲傷旣甚而孺人之死又能卓偉如此故爲記於墓上銘曰

天地氤氳孰錢而生其死則已孰導而迎執妄爲神異說孔殷安爾真歸勿墮  
勿淪嘉定九年十二月□日

故知廣州敷文閣待制薛公墓誌銘

公名弼字直老薛氏自晉徙閩者左補闕令之在唐有高人之目補闕孫懷仁  
爲温州人懷仁九世至公曾祖元禮而父強立始及第終江寧府推官公政和  
二年進士任懷州刑曹教授杭州召對語不合教授滄州年饑賑以學廩守拒  
之公曰民餓死士何忍獨飽糴不償某當坐已而補舊有贏糧焉辟浦江令時  
所至告事魔者牢戶填溢縣亦誣逮數百人公一筆放遣燕山免夫錢旣集而  
郡仍別科公執不下民自載輸官曰寧費錢毋失令也知桐廬縣清江丞監左  
藏東庫中官王道使奴挾旁視絹美惡多取之公白長貳下奴獄驚曰何敢然  
亟移病請致仕長貳度不可詭奏宗室不奉法縱奴橫帑藏陰祈道流其僕且  
以旨押公就職乃已女真犯京師李綱定議守禦衆不悅公意與綱同除太僕  
丞參其軍城圍解遷光祿丞公嘗言姚平仲不可恃未幾而敗綱救太原又言

虜必再至宜先事河北且綱不當去宋伯友提舉河防以點檢見在糧草從伯友爲計畫甚衆皆不用乞罷歸提舉三門白波輦運又上書擇代伯友者旣而分委安扶等李回復守河公歎曰今敗矣遂主管明道宮六年高宗帆海入青奧門幸水陸寺公見呂頤浩言島岸蕭條無以安上躬不如蹕郡廨增舟取財皆有定所民不加斂扈從休息提舉淮東鹽湖南運判王瓌捕揚么久無功更命岳飛么據洞庭陸耕水戰樓船十餘丈官軍徒仰視不得近飛謀益造大舟公曰若是則未可以歲月勝矣且彼之所長可避而不可鬪也幸今大旱湖水落洪若重購舟首勿與戰逐筏斷江路壘其上流使彼之長坐廢而以精騎直擣其壘則破壞在目前矣飛曰善兼旬積寇盡平進直祕閣是冬震電大雪冰厚尺餘席益煮粥於市益去尤甚白晝剽劫羣行而飛責月椿錢鄂鼎運分撥米甚峻公具奏天災民窮詞甚哀切上惻然動爲捐二十萬出廣西常平貸之潭永間始復生理王彥自荆移襄遷延不卽赴彥所將入字軍中原勁卒也朝廷疑有變以公直徽猷閣代之問策安出所從兵多少公曰若志在除彥某書



生也非所及代之則湖南送吏足矣彥殊不意公至徑入府受將吏謁大駭公曲折譬曉又大悟卽日上道卒賴以全除岳飛參謀飛母死遁於廬山張宗元攝飛事飛將張憲因辭疾下多効之洵洵生異語公強邀憲行軍謂諸將曰太尉力乞張公而詔使隨至岳家軍馬素齊整無故忽誼鬧是汝輩累太尉也諸將以告憲憲佯悟曰相公心腹惟參謀知耶飛尋起復時去鄺瓊纔一月人謂非公此軍亦亂矣入爲戶部郎再知荆南桃源伍俊旣招復謀叛提刑万俟卨不能制公許用爲靖州喜曰我得據一州過桃源遠矣卽出謝伏發擒庭中收其藏粟食十餘年新疆還進祕閣修撰陝西都轉運使以左司郎召知虔州主管雲臺觀復知虔州修撰集英殿知福州廣州待制敷文閣紹興二十年九月二十日卒於廣州年六十三二十二年十二月甲申葬永嘉縣太平山自宣和失馭天下安土樂業之民皆化爲盜賊更起滅千萬計劍槊不能勝旗榜不能綏垂二十年狙啖勢窮乃稍弭戢而虔南雄南安三州楚百粵首尾地尙憑負巢窟熾張如故公前後討蕩俞三古五官朱關索吳錦等賊相謂剝皮殿撰而

閩入郡管天下伍黑龍卓和尙何白旗邱崇廖七嫂滿山紅之屬數十萬公教  
奇兵立左翼軍拔石城人陳敏爲統制積四年平豪賊百七十部初閩人依險  
立砦以守久則自爲賊公令有砦者勿葺寇盡砦亦空民返家室道路夷行故  
紹興雖忍垢買和終納外侮而內地馴服綱紀粗伸繇能用公而閩楚之功集  
也汀州李谷反信宿三萬人公急會師斷首尾夾擊浹辰谷敗僚吏不知也海  
寇陳小三載艘六十距境上給鄭廣兵三百與期三日求濟師不許二日大風  
賊不能進退盡虜以獻請曰始以一擊十不自意全公料三日何也公曰第從  
吾令無問所以然蓋機速神敏多此類而其家所傳則有甚異者余不得盡記  
也方艱難時士無賢不肖皆踰視苟息惟宗澤未及成忿鬱死趙立翟興不幸  
喪敗以功名著者陳規胡世將鄭剛中而已公常勝無誤不以意氣加物裁割  
應手小大各成殆踰於數公然初佐李綱與時論忤中從趙張事薄晚而秦檜  
擅國深檜事天下不樂聞雖如公者未有以別異而獨鄉人夸誦之爾可數也  
然檜嘗欲引公爲戶部侍郎公恥以言利進不答頗怒故止於外藩將死乃得

待制則公之爲檜用自其資所喜而非利之也公旣爲岳飛參謀飛與其徒妄臣反冤氣貫日月獨公幸免其子弟或以咎公嗚呼巨浸大疫殺人成邱死者之家不怨免者知不以己之所遭同於人也檜果於殺飛而不忍害公天誘之也岳氏何尤焉夫人胡氏劉氏子叔淵福州教授叔宣嚴州錄參恂愉壻吳龜年檢正諸房公事季升參議官孫洪朝奉郎浩朝請大夫澤潮州司理潤上高主簿曾孫師度池州司戶師旦建康權貨務師昉象州錄參師善師石師睿師山師道師昂將仕郎師昂師正於是後公六十七年前輩無在者雖鄉人所夸誦亦漸衰息浩未歿屢請余誌其墓不果而余又老且死且與石皆曰若是曾王父之烈殆其無傳乃敘而銘銘曰

薛絲廉村派於永嘉逮公十二始振厥華公學詩書公本仁義天機流行且勇且智宴安之從士如束蒿礪其頸吭嬰以斧刀惟公變化舒慘莫測鬼域陳前雷電掃跡閩攘楚劫億萬雄羣惡首旣鉏還我良民北北南南再奠枕席助成中興時公是力天下大矣非材孰理建紹之間數人而已彼或不及磊落而傳

此實過之寂寥僅存佞碣諛碑何必遽載論久益明銖兩奚貸伊柏有孫伊松有子爰刻墓門以示無止嘉定九年十二月□日

故朝奉大夫知峽州宋公墓誌銘

曾祖表微知解州祖炤知豐縣父坦贈通奉大夫公名紹恭字彥安歷監南嶽廟明州比較務心喪免崇安主簿麗水縣丞知永嘉縣兩浙運司幹官心喪免通判江州知峽州嘉定九年十月初九日卒十年三月初九日合其配蔣氏葬會稽縣五雲西鄉秦望金山於是宜人先十年矣子曰駒登進士第淮西總領所幹官曰騷早夭曰騷徽州司戶女嫁古靈陳杓知蘄水縣唐溥涑水司馬楊皆已卒孫曰永孫德孫右孫孫壻曰山陰任獻可公之來永嘉不以余賤陋損邑大夫重坐語常移日意所縱奪微辭抑揚余默受教論承平至渡江公卿行事本末其人賢不肖無一差忒爲之悚聽躍立激慕摧省多矣而公治縣約期會緩征役早計預定陰化潛弭視新進後生乍出智慮聚沙畫墁欲以立名字造威福者力相百功相十也吏民皆稱公聰明允恕易事而難悅謂後此更十

五令無能繼者而其前亦鮮及也公既中原故家見聞所趨與南士異外侃樂而中伉儷於其鉅儒名人雖無不敬愛然猶不自滿至暴興者無所屈改素貴者無所假易然終不示以同異之迹故世雖不能知公而亦不能測也其爲峽州卽自乞不行六主冲佑觀年八十五憊老不生於色慢游不設於身未卒前八日親燎燔奉祭命駒謁冢下皆如常禮疾作子孫奔走醫工交錯公笑曰吾命有所懸矣戒其幹力曰晴久省倉燥官輸速了乎初宋氏趙州平棘縣人而公奉議郎茲丕之子也五世祖宣獻公佐仁宗賜其居京師春明坊四世祖常山公遂爲開封人靖康之難宋氏奔迸或在蜀或在越事定解州家竟不知存亡祕閣修撰名輝公之從叔父也請於奉議以公後通奉而以修撰遇郊之恩任之然後解州始得祀於南方余觀五胡亂中國三百年士大夫氏族猶相通不以南北彼此限斷蓋南之號令征伐尙時至於北方故也宣獻賜第在守文極盛之時常山徙宅當稽古更法之際世臣巨室入衛都邑尊隆本朝豈非重內臨外之義當然哉甫一再傳天下橫流至於父子兄弟不能相保飄轉數千

里外死生莫辨疑信不分特以魂氣之所之歆舊祀爾顧平棘今在何許蜀越有無一宗哀哉駒博習古今與余講夷夏感衰詳矣孔子許管仲如其仁然則非繇賜所能知歟銘曰

繼絕於罔象之餘立家於播流之後前軌尙存舊聞可守憤發新功益振今有嘉定十年二月□日

故運副龍圖侍郎孟公墓誌銘

良甫名猷姓孟氏元祐皇后姪曾孫信安郡王孫世家具國史以承奉郎監秀州糴納倉歷臨安府樓店務嚴州稅麗水縣丞浙東常平幹官除籍田令通判婺州知南安軍信州召爲都官郎中改左曹尙右出淮東運判入爲軍器監左司郎中直寶謨閣兩浙運判副使太府卿兼刑部侍郎主管沖祐觀知婺州直龍圖閣江東運副復主沖佑觀於是階累朝議大夫初余入吳而良甫兄弟最先至氣斂然滋恭語退然益卑齒寒士中不見異余謂世多賢公子習使人親近己固然爾徐而切偲反復卽耳目之近以驗事物之遠瞻瞬領徹貫穿縱橫

雖寒士之深於造詣者不能至後數年行加修名加聞天下言王公家無不高  
良甫之義繇此更踐內外出夷入險擇而守中勞而有成幹方舉德而莫有助  
之者也良甫之學以觀省密察爲主外所涉歷皆切於心身所覺知皆反於性  
凡情僞錯陳橫逆忽來幾若無所撓拂而筋骸之束肌膚之會常得繇於順正  
其專悟獨了動用不窮蓋非簡策所載箋訓所及然余欲其博達倫類盡究古  
今之變以進於昔之所謂知道者而良甫亦未能也道者天下共繇之塗也使  
有人焉以爲我有是物也將探而取之而又曰我能得之矣則其統已離矣老  
聃曰道沖而用之或不盈淵兮似萬物之宗又曰猶兮若冬涉川豫兮若畏四  
鄰嗟夫聃遁世不回者遜而委諸人可也乃執而自有之若是之固歟良甫立  
朝無黨與未嘗示人以同異之跡士大夫敬愛而不敢狎也方籍田時以僞學  
斥士且盡獨不及良甫然遂自乞外補後稍復收引而良甫已先入爲郎及兵  
議起卽被使出淮東至兵罷而罹其禍者衆獨良甫爲無所預將用之矣然亦  
竟不欲爲容而去蓋其出處之際可攷者如此其治民考功因舊循常無所改

作必有更革尤務靖重所至皆安其政令然良甫所長當危疑未定之時曉暢彼此之情以濟國事會通翕合之日協同賢材之類以新治功故不以一能一職爲稱雖其可稱而亦不足爲良甫道之也良甫平居嚴己恕物不立岸限後進晚學幽人野士有善意者日滿其門喜爲詩無風形月狀浮劣之語間出一二縱然金石有警於世卒年六十一嘉定九年十二月七日也十年五月二日葬於吳縣白羊山夫人呂氏子繼華舒州觀察推官繼顯丹陽尉其天也先良甫四月或謂良甫之疾由哭繼顯而然然則學道之力無用於哀樂之間歟死生命也不以子審矣果以子也東門吳之放曾不如子夏之褊也是良甫之道非離人羣而自逸也銘曰

勿謂道存迅疾不留非智能知非力能修惟余良甫少成於天古有今無人十已千操其一機以應萬有竭海糜山如屈伸肘余未及死子胡遽亡視此銘者淑人之傷嘉定十年四月□日

王太孺人唐氏墓誌銘



臨海王斐之母曰唐氏寧海農女初校書郎王夷仲廉士貧甚其室賈夫人年已晚猶身治纒滌舅族憐之爲致唐氏纔十二歲纔箴細縷釜甑盤筵不唯諾而集繇是無以辱事累夫人者後十六年斐生生時難賈夫人親爲舛勝胞絡乃得下又三年夷仲賈夫人相次卒家益衰兄弟析耕不數斛父母迫以嫁不許曰吾必自斷其髮然後止凡斐幼長師友筆硯覓舉近遠雖費而給未嘗告假人見謂孤苦有立志交重斐旣乃知爲唐氏力也又三十年斐上舍及第佐郡府登朝出守迎太孺人與俱無纖粟改常度每戒斐祿料未易消當謹身報國而已又二十年嘉定七年四月己未歿於衢州郡舍年七十八七月癸酉葬臨海雲溪山又三年斐奉使浙西書來曰斐也懼親之不獲於傳辜負罔極是痛然未知舊比應銘否蓋古今所稱以有容無忌爲賢而美不及子以子貴成親爲榮而義不在母若夫擅寵而虐偏嬖而驕淪覆於家近爲殷鑒皆是也太孺人始也勞而後食爾暨失主單特空手鞠孩孺心教意飭隱然律程日就歲成使夷仲之世再顯殆天啓其節以床王氏歟烏用舊比也銘曰

江包衆流前派後別有洌汎泉佐江之竭行爲巨川止爲重陂唯心之亨是以

永垂嘉定十年十月□日

故大宗丞兼權度支郎官高公墓誌銘

予妻諸父高公諱子潤字畢老主烏程縣簿真州判官孝宗知其名召使赴行  
在公絲遠地下幕一日天子有命晝接喜過望亟裝欲往而母楊夫人忽病謁  
醫久未損旣而公亦病醫無術謾云久且不治矣公驚嘆曰明主思見我而不  
幸母子皆屬疾或者天不與吾行耶重留君命無益祇爲罪耳遂以情自乞詞  
悲甚孝宗不能奪而憐之爲改通直郎賜緋衣銀魚致其仕當是時高判官蚤  
退之節聞於天下公旣得謝疾尋愈因不復預人事常穿黃草履刺白蓆艇往  
來田間人罕識其面垂三十年開禧元起爲大理司直遷太府丞太宗丞兼  
度支郎官初公在烏程疏三十二縷達於太湖復晉宋舊跡在真州創定城營  
房五千費減十五故孝宗以爲材比再出適會討虜糧乏倉猝糴二百餘萬珠  
粲而瓦寶江淮諸軍滌甑釜待饗至然後飽食朝廷方賴其用而不悅者謂公

昔固不仕爲亢者也今安得屈而復仕當返初秩而已公繇此坐廢卽復具野航出沒圩圩如其故態不少介吝嘉定十年年七十七八月二十日以考卒公蒙城人宣仁后弟士林曾孫也公紀兩使留後世賞知閣門事父宗之文吏官益薄通判婺州高氏來南方禁省隔絕公辛苦自衣食不租舅戚餘貴學通古今暗記左傳漢書引筆高麗爲人穎邁肅潔如琅玕玉樹無塵土意聽其語泠泠然吳儂楚些之鄙都盡而幹敏強力老練世故審動而果慮遠而成惜不究其伐而頓抑以窮死悲夫退固人道之甚重而止者義理之奧樞也在良之象時止則止時行則行然則我非敢自命而世亦不以是格物矣公之不得遇孝宗蓋時止乎然世莫或知而誤言之謂公特自止而已及公悟其不可以終止而上又因而起公此亦公當行之時也然世又莫察而文致之遂謂其既止則終不可以行焉夫惜其止而勸其行人之理也因其止而禁其行豈人之理哉故予於公暫出終處爲之痛惜而訃聞之日哭之至於過期而哀非以親舊私之也先夫人曰薛氏後曰劉氏皆前卒子男曰不華不矜不謙不矜爲兄子沐

後不諱爲弟子泳後皆楊氏命也公既自衣食婺州遺業悉使其弟有之其幼弟公尤愛惜又自輟田以衣食之屢矣女之壻曰鮑子明王田趙希翱劉采田朝奉郎湖北提刑希翱承奉郎監明州造船場孫二人曰晉彥宋彥公先治湖武康上柏山豫爲冢藏十二月某日不華奉公喪以歸恭惟宣仁后以國爲家以民爲身以賢爲命以仁爲術治成元祐天所顧饗與宋無極萬世載之者也今其親外家零落細微餘十數焉其僅得列於士又十數之一二焉若不華則以庶士守其廟矣士不得以諸侯祭禮也況士庶哉嗚呼公之折節復仕爲是夫銘曰

穴穴萬生兮有翹森森千丈兮寒標噫胃出兮宜愈大又不磨卒摧折以盡兮悲奈何

舒彥升墓誌銘

以鐵易銅錢使常在內地不流入寇境執事者所知而必行也然而沿漢淮上下二千里銅錢在江南不加益而泄於北日甚此執事者患之而不能救也遂

其所必行忽其不能救予固疑之久矣紹熙初鐵錢法弊商賈頓虧折所至皆  
皇惑罷市余偶爲蘄州被使一路奉 upper 指盡力安集歲餘方少定然自是銅鐵  
錢有倍再之價淮人貴衣高食不復易活如往年矣於時州縣吏能寬刑審慮  
以善道佐余者惟舒君名杲字彥升信州永豐人予同年進士也曾祖錫祖子  
誠幼自知學夜讀書設水加木于地每困寐足跌有聲輒驚寤復讀以爲常其  
勵志如此及第授寧國尉父若德母徐接死主蘄春簿辟知同安監又辟漢陽  
監以鐵錢相首尾十年教其人使擇利害避就有不及不以爲罪教之如初所  
鑄輪郭肉好皆爲式於後不可改故私錢遂絕而官鑄流通至今嗟夫天下固  
有易行之法雖不肖蔽昧迷失猶不大壞也不幸而難從非賢者順導委曲而  
不抵突以敗寡矣易行之法不多有行法之賢不多見適得一人如彥升者相  
與調護收拾於奔潰洶駭之中可不謂難乎奈何生不盡用而沒又將無聞宜  
余之愧歎愛惜而不敢吝夫詞也彥升旣去漢陽知新昌縣主管江西運司文  
字分差鎮江府糧料院朝廷錄其勞使幹辦行在諸司糧料院遷國子監主簿

嘉定九年六月十六矣其五月十七日足疾卒秩累朝奉郎贈其父朝請郎母安人又贈其先後室周氏皆安人明年八月五日子傲之似之侃之伸之壻周夢發與爲兄後者份之葬彥升於崇善鄉大安山彥升病酷吏恣威虐而世以爲有風采貪吏橫聚斂而世以爲有才具常懇切爲天子陳其故使行其志殘暴可息在蘄春增陂池九百餘種稻十萬斛新昌復已失稅數千而同安漢陽減工費各半使究其材事功可許仕不希進余與石應之強使就辟彥升初不願也江西以薦往竟逡巡詣選而歸使居其位躁競可消銘曰  
自上世貴廉方有恥之人悃幅無華之士臨民而官治在朝而俗美嗚呼彥升其幾是矣

鞏仲至墓誌銘

予友仲至鞏氏名豐時新迪義理之學草茅士震於見聞多矜露忤至他文史言論儒之藝業又昧陋顛倒莫知幅程獨仲至抑縱開闔條流品彙應變不迫富若素有予本拙疎不能自達而仲至廣導曲引出幽入眇蓋爲之龜勉追

逐於荒原斷澗之側數年仲至日益有名不幸不得用然有以自負命雲侶月  
跨越汗漫浩乎不可挽而余畏懼怯劣常癩留一榻不敢越戶限然後知人之  
稟分高下絕殊固非切磋誘掖所能增長矣異日仲至謂余吾登芙蓉上峯因  
以過子將又發藥也而不遂竟死悲夫初仲至以太學上舍對策高第教授漢  
陽軍代還舊例皆自學入館有不喜者纔授廣東提刑司幹辦公事母喪免人  
曰不復外補矣又授浙東會改法本路人不許爲監司屬官人又曰再易地而  
不果其當徑來也然卒令幹辦福建帥司公事以格知臨安縣政尙寬簡吏民  
信化刑罰衰息人謂仲至極不應在州縣今蹉跎滿秩矣尙何諉會其所善爲  
學官仲至勸使拔滯淹士反坐此食宮觀祿久之始提轄左藏庫於是衆意益  
不厭遂妄稱旦夕居要職矣不知語何所從仲至亦不自知也竟復以宮觀罷  
士皆失氣悒悒曰窮至此耶今當何爲其員外通判乎或曰不能然則正任而  
待其闕乎猶不與復授宮觀而仲至死矣嘉定十年正月晦也其家鄆州須城  
渡江卽所寓土斷爲婺州武義人曾祖燾祖庭芝皆左承議郎庭芝所謂山堂

先生者也父法鄉貢進士前此科目相傳七世矣仲至學敏而早成自童丕時前輩源緒古今音節事之因革總統如注水千丈之壑迎前隨後宿艾駭服以爲積數十年燈火勤力聚數十家師友講明猶不能到也其文無險怪華巧而以理屈人片詞半牘皆清朗得言外趣尤工爲詩多至三千餘首自舉賢尙德之義廢而進人一出於課試之虛文苟有其一則清資顯轍執契而取仲至不多有乎剛者折而不行柔者流而不止惟正己不傷物於用世爲宜仲至不宜乎又曰顏淵買誼短命惜哉非時不子用子不時待也仲至壽不七十乎自上市有金匱石室之藏或達書命諭意指皆選文學博雅之士下至鴻都翰林詞賦篆刻猶各專其官出內之吝非不欲參其間技不兩能也故蒼槐翠竹必植於庭宇仲至可爲帑吏乎凡此皆疑誤之難通者也性質易無岸谷暇日載一瓢獨行田野不問岐路抵暮而返去家二里有龍門峽登眺徘徊慨然曰此可止矣初阮夫人卒殯於大慈寺東塢是年十一月壬寅二子積耕迎而合葬焉五女子壻曰右監門衛大將軍善韜進士高槐上饒知縣張友常山縣尉周



維新幼未嫁也孫男曰左曰弼孫女二余既爲銘而季氏仲同自温州移使江西遂持以歸曰讀於墓而哀吾兄然十句必九慟不成聲也銘曰  
聞於程子天地之生材甚愛甚惜必有恡固之心蔽賢者爲天地所恡固使之氣沮志奪怫然而怒聚爲陰陽之罰則其人雖大必折雖炎必撲荒落而頽圯敗而族激哉是言也天地雖甚愛於賢材君子初何心於用舍仲至之靈果上愬於天耶吾謂必且爲祥風慶雲醴泉甘露以瑞斯人使其富貴壽考蕃永而無極也何荒頽圯族之有嗚呼

史進翁墓誌銘

進翁史氏諱漸明州鄞人曾祖簡祖詔贈皆太師封冀魏國公魏公以行舉子孫位執政宰相君父木爲中子貢於鄉者再號貢元虜嘗奄至四明官吏棄城遁居民不脫死獨貢元能具舟楫依而免踰二千人君幼孤育王氏稍長還墓行服哀痛如初喪入太學友吳益恭石天民論事褻貶儕輩用爲準的二兄將分異趣使謁歸謝曰筆硯不可廢未及返也約成授以載書領之而已間然自

念少而求仕壯則行於人壯而失仕老則行於家既四十矣宗伯不以我爲材  
意者失仕乎尙漂搖旅寄何益始去之山居誨其子於學既厲以古方冊事業  
或今人有善不知必錄以勸之己有不善不知必錄以懼之曰汝謹爲此勿爲  
彼也親黨子弟請並塾同師有遇亦折難無隱所以廣其子之習也歲時合近  
比數十家燕齒酒三酌父坐子立至今行之所以同其子之敬也甥宣繒始未  
知學衣食訓誘與諸子均其後兩優釋褐爲侍從有名於時常歎曰非我敢能  
吾舅之恩蓋君八子彌愿太學生及彌思早卒而登進士第者五人可以爲多  
矣然世之多者徒長傲崇侈使道愈降俗益薄其所以得非所以教也故教以  
廉不營利矣教以退不希進矣教以讓能下人矣教以見危致命則臨大節而  
不奪其志矣非口以率身化之也鞠孀母未葬不得應書有戚容君憐之割所  
愛山葬其三喪棺以外皆助之豐時中死貧甚族姻欲葬於火君曰禮歟其子  
曰少遲銖積而葬可也君曰有山則費減十七亦割所愛山曰速矣二子已仕  
頗有餘奩一日集所親貧乏者散之皆盡初賃宅富人異時益子舍富人忌其

方與競不許君不復較撤舍止役其無吝情無爭氣不爲機智屈己伸物庶幾  
以身化者故諸子皆平進自守無過求諸孫惟以文字相課督名第累累不絕  
然則天偶畀之數亦君之所遺宜然也卒於紹興五年八月某日年七十一娶  
莫氏無子先卒繼室高氏有家學子在母不輟誦能言授之書師之禮幣脫簪  
珥以質酒食親調嘗以進時享必齋治喪屏道佛或以爲疑夫人曰先侍郎修  
厚終禮未嘗言豈非不足於禮乎侍郎閔也然於浮屠空法多悟解嘉泰二年  
四月某日卒年六十七初莫氏葬鳳翔鄉上水寺山至是參焉子彌忠朝奉郎  
知吉州彌恕彌念通判江州彌鞏教授汀州爲從父溶後彌恣昌化主簿彌應  
寧海縣尉女嫁臧昶陳燾蔣亢宗孫男嵩之仝之歸之皆發解進士仝之攸之  
巖之長興丞巍之會之望之一之十之孫女已嫁者平江糧料院王寓江淮書  
寫機宜文字李伯木國子進士臧元堅里士王興曾君去太學二十餘年光宗  
立詔錄舊人語故同舍第勉行吾老矣再封承奉郎再贈承議郎莫氏高氏安  
人銘曰

以學立子以子立家森其成材舒英擢華有大之椿桂也叢生蔭垂東南永延厥聲

林德秀墓誌銘

林穎字德秀生三十一年卒自童幼孤苦無慢情戲色居囂煩之域未嘗不靜暇也混漁鹽之鄙未嘗不肅潔也入教弟妹出從友朋皆有矩法其於學知所謂大者而好之審所謂疑者而通之求所謂是者而正之矣不幸得熱疾數日死悲夫孔子曰苗而不秀者有矣夫秀而不實者有矣夫材者所賴以生養也人紀所待以立也人文所繇以明也苗而秀秀而實則民命常永矣天也雖然其不秀者固嘉種非稂莠也其不實者固良稼非穉稗也敗之以水旱而不使至於穀亦天也知二本之皆一成毀之自天則余於君無憾矣銘曰其壽爲伸其夭爲屈去來冥冥理焉攸出十一年十月□日

水心文集卷之二十三

墓誌銘

宣教郎夏公墓誌銘

夏庭簡字迪卿曾祖咸祖克修父思恭世家台州黃巖慶元五年登進士第黃巖浙河東大邑賦當其州大半魚稻之饒被鄰境喜讓善施温克多異材然自隋唐設進士諸科而其地寂寥湮沒無以名稱者宋興且百年始一見又百年始再見又或始二人或越數舉積而至於君然後始羸十人嗚呼何其少而難也昔王元之蘇子由皆病進士取人猥多得者濫易無益治道余初以爲篤論然以黃巖觀之廣地且百里衆民過萬室累數百餘歲矣苟有以取之其得宜不止此然則果欲爲治豈輕絕其人使不得仕耶古人各治其國士必先自足於私朝而後及上勢不得多且易也今盡取於上復分以涖其下雖多猶少雖易猶難爾且隋唐貴進士號異科尤異者山人制策勢亦不得多且易也今無以差等壹命爲進士審如二公意必於取士之法大有所改故余因黃巖進士

之少夏君獲預十人之難疑其論猶未篤也君初補定海尉連遭二喪授長溪簿益讀書明習今古親仁敬士林叔和趙幾道皆愛之往來長溪必過余退然下席隨所遇若素稔語不妄發問則博辨余亦愛之既而聞其在閩思不出位而以事至者常立決是非少所徇諸司及士民亦愛之調臨安府都鹽倉未久嘉定十一年某月某日無疾卒年四十六八月丙申葬靈雲南麓娶柯氏子二人曰紹堂紹基三女子余固悲君成於艱地而列於稀稱若將有以遇之也不幸死則終無傳銘曰

文無害行有恥載六百贏十士慨不逢表幽里嘉定十二年六月□日

兵部尙書蔡公墓誌銘

公温州瑞安新城里蔡氏名幼學字行之曾祖昌祖廷直父贈通議大夫端卿中乾道八年進士第初同縣陳君舉聲價喧踴老舊莫敢齒列公稚甚獨相與鴈行立比三年芮國瑞呂伯恭連選拔輒出君舉右皆謂文過其師矣孝宗親策將爲上首公乃言陛下始卽位冀太平旦暮至也奈何今十年愈益壞乎語

諄切如家人父子又宰相虞允文梁克家養虛譽苟容而張說姨子預兵柄有許史丁傅之漸孝宗初不過也或疑天子聖德方日新公少年論諫盍順導婉達繇是不得高第教授廣德軍通議卒待潭州教授闕執政言蔡幼學未登朝可惜孝宗遽肯首問年幾何矣何以名幼學施參政奏孟子云幼而學之壯而欲行之故幼學其名行之其字上佇思慨然曰今壯矣可行也已差勅令所刪定官對語如策孝宗喜曰解卿意欲令朕立規摹爾甚善然後知上不以言咎臣下而公亦未嘗變所言也碩人黃氏卒除太學錄未行或請武學參用儒臣爲其博士久乃爲太學博士召試祕書省正字兼實錄院檢討官遷校書郎著作佐郎朝廷念輩流多要地猶滯館下議進擢公歎僞學禍已成朋類將散求外補特提舉福建常平茶事御史劉德秀果言公嘗許孝宗罷再主沖佑觀凡八年知黃州福建提刑未上召爲吏部郎官國子司業兼權中書舍人宗正少卿遷中書舍人兼侍講韓侂胄死餘黨尙梗塞正路公一掃絕竄免尤衆號稱職除刑部吏部侍郎兼直學士院趙師舜以冬官知臨安府公當不允奏師舜

之人與其行事衆耳目素具也於是四典京邑非臣所知不允必有褒詔臣無辭以草遂止改兼侍讀師彝命復下除龍圖閣待制知泉州尋提舉興國宮知建寧府福州寬而不犯肅而不殘治居天下最提刑喜聲威不以獄市還州縣客謂公名盛體峻何得許公笑曰此小節耳不足校也命吏報應無失期會民恃公少安提舉使民以田高下藏新會子按不如令者沒入其貲公駭曰此大害也昔吾在朝論從民便爾不許第多其兌易而已民賴公獲免然提舉善士也後知其誤卒皆已之除寶謨閣直學士提舉萬壽宮嘉定十年召權兵部尙書修玉牒兼太子詹事其六月有疾夢神告曰可歸矣隕星屋西南七月二日薨年六十四先碩人林氏今碩人鄭氏子曰籥承奉郎仙居丞爲二弟後者節策節迪功郎浮梁簿策補致仕官曰範縱政郎監鎮淮酒庫孫曰紹老孫女四人十一年四月十八日葬於永嘉吹臺鄉洋奧山公內負實力而憂世至深憤恥復讎無悠悠碌碌之論節減與民無奇奇怪怪之策所知必立所立必遂不前銳而後挫不外強而中弱雖於孝宗君臣之交未合自謂愛君惜日當如是



矣昔子產增賦渾罕致譏冉有倍粟仲尼鳴鼓蓋據末反本之難也非公師友  
深慮而知化孰能考次熙寧而後節斂自取民困兵驕所以致患之由而告於  
上哉若夫不別夷夏不分正閏恬其仇我俛焉並立甚至以爲戎狄之德黎民  
懷之若天眷命而然則尤公師友之所諱也初我幣已入值虜有難不暇受稍  
定則以兵扣邊索中外恫懼無不言當亟與公爲尙書卽日請對明其不然始  
詔與虜絕因請固本根以弭外虞示意向以曉衆志公汲引而材謀奮審懷附  
而南北親條序簡捷士皆驚誦謂何勇之決也上方倚以經度西北而公病矣  
嗚呼豈亦所謂鞠躬盡力死而後已乎雖幼以文顯無浮巧輕豔之作旣長益  
務關教化養性情花卉之炫麗風露之淒爽不道也詞命最溫厚亦不自矜貴  
惟於國史研貫專一朱墨義類刊潤齊整各就書法爲續司馬公卿百官表年  
曆大事記備志辨疑編年政要列傳舉要等百餘篇今代之完書也資凝重危  
坐竟日或不通一詞龍窟陳同甫言吾常與陳君舉極論往往擊栝案聲撼林  
木行之在旁邈若無聞吾頗訥之衆亦云素無短長於間也一日客盡散忽語

吾道一爾奚皇帝王霸之云吾方辨數而行之橫啓縱闔援今證古釐爲十百聚爲一二抵夜接日若懸江河吾謝不能乃已則復寡言默默如故故雖並舍連榻不知也然則昔人謂得人於眉睫定士於俄頃亦豈盡然歟蓋公之深中隱厚可驗於是矣故并記之銘曰

智過於師道始可傳有佞無仁奚其禦焉蔡公直方不習而利寂舍五音璞具六器夜半東升瞻于方中執德不回終以顯融君能責難民病能寬夷狄邪氣莫能我干木居甚安瓢飲何有世故雲化三者墨守昔余從公一字之謙諸子示我書何滿匳大典既備法嚴義粹玉琰其版金滕其匱雖貴有已雖年有止維書無窮以貳遷史嘉定十二年六月□日

福建運使直顯謨閣少卿趙公墓銘

公名彥俊字安卿繇宣祖四世彭城侯叔娶爲曾祖直祕閣知池州尙之爲祖知饒州公廣爲父調溧陽尉縣民潘兄弟橫猾積爲公私患號三虎邑官莫敢睨公具以白留守陳丞相陳公默不答者累月一日忽委公曰信矣潘悍僕數

百挺刃自衛公開示禍福皆縮却聽命遂縛三虎正其罪移揚州司戶有告主藏吏盜錢千萬以上適兼獄掾鞠之吏涕淚滿頤請死公察其情屏人問故則諸吏所共貸也使視筆帖盡首服一日而足帥大喜然猶欲逮諸吏公懇言某固與約後將無以信帥爲抑止差平江軍節推攝令宜興縣以牧馬券料爲負自南狩則然常預用二年後稅民以此德其令傲不軌法公請諸司合奏釋舊逋禁預借百年弊事絕矣知於潛縣大胥結臺省吏弄權自恣公列其姦械送府而臺吏果欲末減卽力爭乞先罷御史憚之獄得不變浮橋迫市區水數敗人溺死公疊石跨巨梁堅成至今民愛之留其像橋旁公不聽曰蘇公昔所游也因撤以祠通判臨安府台州知興國軍歲旱蝗而開禧兵難作公緩經賦弛山澤通細微村樵賤鬻苦不酬益增錢入之費則損其直以利城郭永興令吳格失上供尤多公坐貶秩格愧謝公曰有事時寬民租根本計也一官何吝且歎曰真賢令矣又薦之虜分道進江以南動駭不自保潰卒千人謀據城外千秋觀爲亂公募能相捕斬者未幾以其首至餘黨驚散人心大安興國雖小郡

而介江鄂中流備守夙設器用犀銳東西依爲重蔽故江淮荆湖兩司皆論公當遷以勸艱難勤力之臣繇是旣轉官復減磨勘遂入將作監爲丞出知袁州湖南運判羅孟傳反累載毒甚郴桂陽公曰猺昔自相讎而鬪我主斷不平激使叛逆已前誤矣今株營兀戍彌漫山谷戰無決勝退虜尾襲誤不可再國之憂也若密間巧說陰誘顯擊彼肘腋疑顧腹心猜防則還自相讎而滅亦其勢矣帥漕議協卒降孟傳進直祕閣考功郎浙東提刑初朝廷患開禧會子輕僅賣半價悉改造及元陌止公扶法以便民雖有重比不敢試也已乃陞寶謨閣知紹興府然後盡所以流通之術苗之移於司農者爲之代輸而折會於民會之滯於州庫者爲之轉糴而資錢於市錢會常相權民無貴食肆無虛券越事力弱而守以貴人相趨於簡陋久則不貲省謂當然鹿鳴禮壞不知何時公始行之儲其永費曰興賢莊築捍海石塘亦爲莊以虞漏穴廟學士館城池壘壁素毀敗者加葺飾麗好比將去不雨數月野草黃赤免下三等戶稅上二等半免湖藉田米不輸舉緡錢四十萬爲荒政助饑羸相扇羣聚陂湖中令尉言且

亂公取死囚纂其首刎兩足號於衆曰此劫萋藕者也其仁智不忍而能靖民如此公雖以徽猷閣再任而旋即用爲太府少卿然不樂居中暫入卽求退以顯謨閣知太平州改漕江西總領使綱運隸其所者皆直達勿團併公曰若此則轉運可罷矣引古今事以辨朝廷是公言如其故然意益不樂復求退移漕福建公三奉使皆稱提會子所行皆如浙東州縣不煩民不病也嘉定十一年十月九日疾卒於建安年六十四夫人樊氏江氏仲氏皆先卒十二年某月日子成忠郎監徽州酒稅宓夫迪功郎嚴州司理宏夫迪功郎温州司戶崇夫與爲伯晟後者從事郎真州錄事參軍師零葬公於武康縣上柏山壻曰宣教郎知楊子縣曾黯尼曰悟空大師孫時泰將仕郎孫女三人幼也始饒州歿而被譴公泣愬十年不避風雨上爲感動復所削奉母孝撫庶弟友愛親善人喜聞過頓悟立改以材取知無所隨附其治果敢疏達而歸於平恕自小官所至著聲績而會稽之政特見獨出近世未有也然余嘗怪越中陸海衍沃山水明秀冠於東南家不營而給人下令而服晉唐牧守嘯歌飲酒永夕而已若夫趣辦

救過而以不足日爲數復賦倍輸而以不賴生爲感則未之聞也然則何歟天反時歟天反物歟其難易得失昔異而今不同必有故矣故公焦心疲力自末反本而民譽之以手加額而未已也銘曰

時所謂材如刃作稜習砥於人以割爲能趙侯懇懇如母哺兒豈無威嚴用之孔時發名開禧收寶嘉定恩涵澤濡在越尤感累閣而進猶梯級間一以卿招遂殞不還慨其生存孰與死滅岸谷有遷茲銘是揭嘉定十二年八月□日

故寶謨閣待制知平江府趙公墓銘

秦悼王四世惠州防禦使叔侯生訓之知永豐縣有惠政軍興數調發而民不煩孟太后幸江西衛卒反攻縣與賊鬪而死贈直祕閣邑人哀之廟祀至今訓之生公渙朝奉大夫公渙生公名彥櫛字文長乾道己丑進士崑山主簿樂清尉大旱令索租急而以故事禱雨感服須公公不往曰損斂已責古人所以召和於陰陽也令不得已爲罷催兩尋澍足改建康府推官郡議復台衣稅公言地爲桑旣稅之桑爲絲絲爲帛又皆稅之帛爲衣且故敵矣又可稅乎且又昔

之所廢其可復乎帥異其言止諸司多薦公者輒推以授同僚章侍郎森鄭尙書僑薦福建運司幹官諸縣欠賑鹽本錢數千萬販賣零落令佐積窮餒公請於長一棄除之舉員及舊例用親嫌去公曰無親安去卒待滿而行知晉陵縣慶元初浙西饑三十縣餓死殆盡獨公能活二十萬又以羨錢爲五等戶代輸繇是擢監登聞檢院時政出韓侂胄朝士無不造門公歎曰諸人今在此足易後復直之甚難添差通判江州彭澤縣妻殺夫州逮夫之父公曰此縣獄所無也而使其父子併爲淫婦死乎爭累日乃已知汀州嫉諸司不薦名士勉而薦者猶扳置庸不肖中是辱賢也乞詔自今傑材須特薦毋得與凡流雜葉八子千人聚汀贛間約曰破清流縣公始至以策授巡尉悉捕滅提點廣西刑獄仕畏入瘴地多依阻幕屬幸日月盡遣還本舉潯守廖德明廉守劉柄顯於朝設抵當庫廩落南無食者公念廣西重困蓋承平時湖南北助歲用或賜封樁錢中興艱難皆廢矣官自鬻鹽利十分奉運司六充郡費四然漕司常取其八而州以不足者責之縣吁既甚矣且其出納之數視中州何有而經總錢乃過正

賦數倍此民所以尤病也遂奏減經總還二分鹽息於郡庶幾稍蘇上是之卽除公運判以憂歸侂胄死召爲戶部郎樞密院檢詳文字朝論謂公材臣將選知臨安公笑曰此豈孤拙所堪遷太府少卿湖廣總領遷卿修撰右文殿知鎮江府辭召仍太府權戶部侍郎未幾三引疾修撰集英殿知建寧府改太平州辭提舉萬壽宮知平江府於是年七十矣公曰吾昔不起今告老而起義安在固辭未聽女真寇邊軍書日數十警慨然曰國有急不敢以既老辭也崑山並大洋盜出沒不可蹤跡以其半置嘉定縣鑿錦帆涇百港縷絡之所宗也又將增墮爲城未及而邊遽少緩公亦病復辭猶不聽使待制寶謨閣以明年七月戊寅卒嘉定十一年也十一月丙申子迪功郎臨安縣主簿炬夫承務郎監臨安府糧料院焯夫合公與令人陳氏之柩於無錫縣富安鄉蒼峴山葬焉孫男一女三公質剛而行良先難後獲貴義賤利以治道隆替消長爲身否泰以善人進退用捨爲己憂樂侂胄始得志鬱挫天下士使不自容後頗悔曰此輩豈可無喫飯處耶稍收拾銖寸與之士甘其晚悟未深慮也侂胄既亟敗忌者反



指爲黨疑似鋤剝不少借公常痛憤謂始坐僞學廢終用兵端斥苟欲錮士何患無名而益友之類絕矣材盡而求不獲有國之公患寃甚而謗不息非士之私恥也每進退未嘗不懇激爲上言又以凡在近臣皆當規諷補切夫已見上殿侍從也直前奏事左右史也故又懇激爲同舍言毋曠素業隳舊典而公自以不得其言汲汲去位恐不速再命爲州終不行一時聞風皆悚慕後相繼稍有言者自公發總領號脂膏地甚虛籍爲大蠹雖廉能自守而明不足檢覈隱糧剩雖大將奪有之十無慮四三公令軍別爲籍兵逸亡馬倒斃皆卽報參伍其少多匿不自占輒詰問或傳軍中狼顧離立族語公曰此特主帥不便爾士卒何損持愈堅三年間籍在人亡贏三萬減錢百萬緡用遂寬比其去餘七百萬而諸路累積逋負猶四百萬盡蠲之余嘗患雅士不親錢穀而自喜析秋毫者必外爲苛斂若夫不出度程之中而自足於經常之內則昔人所未講也夫虛其一心以樂與當世之賢豈非吉人盛德哉然是人也與世務常多闕短而精通流連者挾己長以玩物矣若夫兢兢於道德之意而矍矍於事物之實則

前輩所難能也在廣西柴中行宋億他司屬官也察其賢迎薦之門生謝啓皆  
削投前二十年祠季子晉陵市將沒請余記曰晉陵之先文名胡也節名鄒也  
皆達人也宿道而婉其俗者末也銘曰

嗚呼文長道遠曷尋嶽可量高海可算深黼黻爲章宮徵成音經綜緯錯其行  
欽欽中全一剛以折百壬有書者碑蒼峴之林嘉定十三年二月□日

孺人周氏墓誌銘

夫人括蒼周氏著作佐郎夢祥之女材任家事偶於三山陳垓婦道修飭君教  
永嘉方傾身與士接夜誦滿廊戶烹菜攪糜鼓三伐共食已乃揖就睡夫人常  
驚假稱具無難色士譽君之賢則及夫人將別小學子翹敏者懷以果餌儲以  
方筆或總其角或束其帶顧戀依依尤以夫人爲有恩嘉定十二年九月十九  
日卒年四十三年三月二日葬麗水縣南明山任塢女曰恩娘男曰虎孫君  
悲夫人不盡年莫助爲善思有刻於墓而一郡士亦皆慘慘惻惻自致其請噫  
未見以法爲師弟子而能交相愛若是也豈合於古之道者固不異今之法歟

銘曰

青青者蔬婦手所擇以羹以菹成士之德棄我頃畚追彼石兮

故大理正知袁州羅公墓誌銘

羅公名克開字達父家吉州龍泉縣乾道八年進士贛縣西尉父喪免肇慶府  
司法浙西提刑司檢法官知廣昌縣監進奏院國子監主簿軍器監丞大理正  
知郴州袁州嘉定二年七月晦卒年六十九五年四月丁酉葬萬安縣官屯山  
宜人梁氏子曰晟郴州司理壻曰鍾如阜孫銓李燔胡焯周約禮未嫁者一女  
孫曰侶將仕郎曰仍初公五世祖而下及其羣祖官相接至州倅縣宰旁房比  
院策名數十號一州聞姓而曾祖衡祖革父襲雖有文學不預於仕公每痛慨  
任爲己責他日主司標其文壁間夸同列曰此當一經首必如是者乃爲次則  
公之兄濬也旣上省復當一經首士繇此屈羅氏嶺外荒貊吏用法忽恣有私  
假他印文得賅者守欲以僞造符印坐之公爭曰此於法欺騙爾入重奈何守  
大怒戒通引官卽司法至謁勿入公徑抵案前執愈堅守氣奪竟從公議治廣

昌察而有恩民空縣遮監司乞留問知縣何所長民雜應曰不要錢不信公人不苦百姓此知縣三長也監司愛其語樸歎息而去公詳重孤耿立朝不倚援力論事篤而堅多人廣席疑難所聚聲怡色温必伸其說而後止執政憚其楚楚不敢狎而亦不能親也然公常無久住意會巨豪競沙田數百頃計累訟至大理丞評將沒入之爲貴人德公持不可遂遷於郴入辭勸上事親匪懈而已郴山阻水涸斛米尺絹皆自齎詣郡公憐之爲代輸直數萬廢永豐銀坑還社倉於民其在袁州開禧兵役猝起方取常平啖邊軍廣和糴以續饋輓公出郡錢移於鄰境常平獨完又上言袁無藏粟俵戶停炊洵洵無告和糴亦免約歲用贏縮立準備庫軍之百須具焉袁人不知也兩州善政爲一時冠民繪事以祠公止之曰口成碑足矣龕貯像奚爲又嘗自詠曰撫摩二字圭三復公直一心衡不欺嗚呼若斯言者可以驗其志矣始余游吳爲憲屬檢法偶無官諸生息蔭空廡中街卒俄報新檢法官到烏鵲橋矣亟起迎之舟纔勝二十斛青衫手板外無餘裝余固歎其質易不作官人體然余旦旦挾書坐曹帖牒漫不省

胥吏顧失笑而公齊比款證覆慮明審無不畏服也暇則從余評論往反余摘其文句尤驚麗者吳士交誦公日益有名後八九年公掌國子余適來爲僚又五六年奉使湖外值公居郴二十年出處大略必相與佐佑其間有隆無降也今老至而休四方友朋零落幾盡而公之逝久矣嗟夫振三世之幽緒跨一宗之顯爵好仁惡佞善士傾與而余又特厚之不幸前死銘余職也況晟請之勤耶銘曰

以身爲旌以宗爲成以法爲平以民爲生進非所重退非所輕要其終歸有倫有經念昔吳下暮春堅冰姑蘇之高天地之清舊游雨散新壘雲橫孰憐我衰尙力斯銘

夫人錢氏墓誌銘

同年劉使君與余素舊其守永嘉常減騎數出支坐熟語良樂也一日忽悽然灑涕而稱曰吾母臨海錢氏三王之孫也而以儒顯外妣早喪祖曰家事惟女之任事益理矣然而舅若姨皆曰恩我者姊也故爲女而孝吾父信書而已至

生業則曰惟爾母之德業益進矣然而伯叔娣姒各有承襲不自己出也故爲婦而順諸子方攜抱所習經皆口授不以煩師其從師質訊反復曰某善也某未善也師不敢慢子不敢惰賴以有立故爲母智而明凡此略皆實行不敢增損云也不幸以紹熙辛亥卒明年而葬於黃巖縣龍鳴山三十年矣然而哀不止悲不釋何謂也吾母卒時壽八十矣兄允元不及仕允迪定海丞弟允武吳江簿而允濟掌教婺州甚哉年之高養之薄也今不肖孤忝母餘澤有蹟於朝假使者節從二千石後而親不吾待矣一朝之榮聚茵也一餉之祿糝米也於吾母不加毫末若夫宰木岑巒山雲興伏而闕不以詔斯則罪之大者是故深慘懲痛而謁於子不知淚之橫臆也余不識夫人而識其夫曰承務郎諱祐兼力衆善篤學至老不以家自浼者也識允迪厚而敏識允武果而通若使君信道執德終始不變則固余畏友矣異術而同材異用而同方非毓其源而疏之曷至是夫人之賢信矣夫蓋允元之記曰必求精於理邃於文者噫理本也文末也余不精其本安邃其末銘曰

葬也久銘始有德成於先論定於後

朝議大夫祕書少監王公墓誌銘

公諱柟字木叔故順州王氏石敬瑭叛賄其地於狄遷永嘉亭山爲温州人曾祖震祖延齡父贈朝議大夫輅及其先三世皆儒者不得仕公總兩營賦一舉空廷語壓場屋人謂必與王氏矣旣冠以春秋中乾道丙戌進士第婺州推官孝宗疑諸州上供得無滲漏乎漕司遽令婺州增斛二萬守以下不敢爭公獨言今苗畝七升羅匹十餘千較他郡偏重矣又無故增二萬何以共命會新守周權且至走書白權袖以進上愕曰朕未嘗加賦也繇是凡議滲漏者皆免移台州推官處州張彭殺人謾謂奴當罪第張泗佐之獄四五不承公令泗畫地狀奴所以擊死者泗失對泣與兄訣曰昔勘官皆先鞠奴款定泗和之爾今忽先問泗吾不知所答兄真殺人矣彭遂伏罪一州稱明教授黃州義烏縣丞州索畸零稅帛一分一尺米一勺一升公數曰就整不失零法已苛矣况百倍誅之乎三言於州乃已東陽俗素悍公攝一月威信大立決事千章滯案皆盡民

不敢帶刀矩步而出頑鄉遠逋爭自輸委又請其守別置尉統焉知績溪縣江以東績溪斂最厚民最薄鑿山壘畝乾瘠大半公積錢買田爲新塘六十八場六浚舊陂百頃歲得美熟無以旱報者監進奏院太府太常寺簿坐僞學罷知江陰軍蔡涇者江海之交也皇祐中嘗一疏治填淤久水不能勝舟公私患之公開渠港五百餘里漕輓通流灌注一郡民事瘟神謹巫故爲陰廡復屋塑刻詭異使祭者凜慄疾愈衆公鞭巫撤祠壞其像病良已遷大理丞禮部員外郎提舉江東常平茶鹽開禧之役沿江上下警備洶洶置池州不問公時兼守池言頃歲有金花帽一籃卦住此累年矣近孟思齊至符籙其人忽指而誦曰汝池州城甚惡姑自完何必來思齊軍相顧失色始悟其謀也且虜何畏不乘吾虛一處得入則江南震矣不報募張飛英獻緡錢八萬請城池州又不許不得已補尤穿穴者深其壕水環之抽裏兵守江岸辟劉積中副總管委以軍政池人少安召爲吏部郎中兼樞密院檢詳文字國子司業祕書少監國史實錄院編修檢討官兼侍立罷主沖佑觀知袁州未行知贛州先禮教後刑罰贛人在



元祐黨十有四公徧論耆老曰汝州多正人如此將百世稱之後生可不勉乎  
民感公意相戒勿犯居數月夜或不閉戶矣俗喜麻苧鮮絲纈公課種桑多者  
減役贖罪贛廣間常以歲杪販鹽空聚落往返號鹽子所過輒殺傷官軍故有  
鹽子獄公奏申嚴保伍須行者給憑乃聽是歲鹽子獄十省八九提刑者新進  
少年嗜兵而攪事意不合毀公於朝復主冲佑觀贛人雪涕前後擁不得行公  
曰太守數易古矣今不去後當去耳焉用無益之留賦詩而別贛人刊而祠之  
連告老未下以嘉定十年五月戊戌卒年七十五十一月葬於亭山西原娶何  
氏封宜人子曰煒從事郎東陽縣主簿曰煇將仕郎曰熊壻曰承事郎知宜興  
縣戴桷孫曰僧賢孫女三人公愛民如子母食父訓惻惻若有失建其實利不  
崇虛譽位置處崖峭獨特不輕徇物自謂理所到更百折必往或以勢見屈過  
萬鈞不受也在婺數以職忤其守守貴人也去而再相不一顧周丞相聞其名  
請見之雖不拒啜茗清坐終無所言在禮部頗久次蘇師旦請使見已而後遷  
公歎曰吾義不交匪人今其止是乎鄧友龍勸北伐祈公幸少助要官可立得

又曰前日某人發十策驟用矣公力言無草草國與身將俱不利友龍愠曰公  
壹退怯女子之貞也吾何望哉竟取宣撫去俄而敗書聞韓侂胄死緣坐竄流  
衢信道中不絕至無擔夫可雇公歸未煖席卽奏言權利所趨如禽在鼎采頤  
染指何世無人追仇旣多復恐必甚蔡確新州可爲永鑒滋蔓未已非朝廷福  
執政善之不能改也初尤尙書表知台州公爲其屬相繼同僚者樓參政鑰彭  
仲剛石宗昭郡人石謫逸民應恕林憲之流皆聚焉頗依依友朋箴切不隨吏  
文督迫各一時勝會遠近傳之錢丞相象祖戚家子有淳行尤慕公嘗笏履到  
門公亦爲折屐傾蓋錢公旣相用常法敘進公亦用常禮旅謁而已無所請也  
然揣摩者私料公厚錢甚媚忌者因掎公以撼錢公旣去錢愧悔曰吾本以能  
薄望輕不敢白用王君疑似難明今反累之何尸此位爲因固求罷故錢以公  
退公不以錢進也公四調官方脫侍左三入朝猶在散地雖事多違己而志不  
舍命雖道欲成名而天不與時噫不知柳下惠之賢耶亦素所蓄積然耶余稚  
從公至耄歲月相靡而士之變故繁矣若夫所謂大節者於其去就窮達之際

可以考焉銘曰

王先朔方棄地南徂公雖南產繫北之餘忠爲幹骸義爲肝脾彼夸者子膚草  
是肥欣入不容戚出不惰寧其失物毋寧失我卽以此始亦以此終尙無死生  
安有窮通有兼亭山有涪岷淵人歟忽亡德也永存

郭伯山墓誌銘

君東陽郭氏名江字伯山始余因君請記一時學術之變在其父良臣語中或  
咎余不當爲郭氏輕言道德又預疑學廢憂憤深切非所謂感人心而和平也  
學之初與敏和捷應君父兄最有力四方豪俊不逮門者無幾及好惡異議論  
激奔迸迷匿苟脫譏謗同時爲精舍者皆塞向改室或東書敖蕩自棄於庸人  
矣惟君治故館率子弟鄉里紬繹舊業無替旁州比縣自我而有科目大官數  
十焉學雖不以利言也久而不怠則效固從之矣然則戴翼於光顯之時接扶  
於微歎之後護名士流俗之毀而好以重幣徇州閭榮第之欲而援以先登斯  
郭氏常德歟君本有佐世材用旣習熟師友大指芒銳銷盡不復伸吐勤古餘

日小緣陂塘疎着竹樹阻曲薄粗蔽映爾然余臥病不出十餘年聞君管押三江袋鹽監穿山破鹽場盱眙軍錄事參軍又於其間監泰州支鹽倉車輅院烏江舒城令辟書四來君不暇答也方鹹鹵下濕益夫寵叟爾汝詬病其弊事千蠹百穴君著爲條式使後有矩象城盱眙十二里陡山高危谷汲險遠君浚葺葉池銅山崦披剔暗井水泉充溢尤爲人所稱惜其不蚤得試而今老矣蓋舉改官者垂足而以嘉定十年十一月十九日卒年六十五嗟夫當學術未變時君之品目豈不素定哉奈何晚歲墮落貿貿塵埃中豈若岸巾南堂雲臥月起樂故所聞之道而終其身也十一年十一月十六日夫人何氏子楷檢彬爲弟後者桂女淑孫男寧字孫女三葬君於孝順鄉羅青原彬守郭西濠上不去曰先人食舊德惟子是望噫余亦死矣將復使不知者咎余耶學者千萬世之傳而新美其業以繼父祖者楷等之責也銘曰

菽也筭之薪也斧之不厭不歆神錫予之其子其孫其仍其昆其學惟實不惟

其文

竹洲戴君墓誌銘

君戴姓名龜朋字叔憲台州黃巖人祖舜欽宣和中進士上書危言天子不怒賜同出身南康軍司戶父秉中亦有材氣補進義校尉不仕嘗自贊其像爲時所稱君生六十二開禧三年五月某日卒娶蔡氏子曰樞曰周孫皆先死以從弟温之子大本爲子一女嫁林珍嘉定十三年二月某日葬太平鄉黃仙山蔡氏姪滂請余銘滂父鎬余友也不得辭滂言戴居南塘山易材海易漁田易稼聚族數十富樂累世自君父祖皆知名而君及從叔秉器尤爲邑里所敬有鉅人長者之德族人新爲宅者將立門以出秉器故有大圓正直門處族人不敢謀秉器知之中夜毀圍夷其地旦而門立則坦然無有族人殊不自意秉器亦不復言蓋其平生行事如此甚衆君少苦學取友必勝己文記詩歌務爲奇卓清簡無俗間鄙腐意性介特未嘗輒以私謁人而人急難若己痛疾救之不懈喘僦宿者與廬露殯者與山然力不逮秉器故所施亦狹而心無不至也歿既久懷其恩者語則涕下不自禁余旣聞二戴事而思天下之廣人類至多其爲

善宜不絕可傳而不得傳者不爲少也然則君之得傳豈偶然哉銘曰

象物之潔以竹自環洲縈渚穿萬其環玕昔王逸少寄於蘭亭修竹茂林千載猶青竹洲在亡視其子孫竹耶銘耶孰詔以存

包顥叟墓記

包君年五十淳熙九年十月某日卒十一月某日葬永嘉縣塘下原君子之履常思其父之久而存謂有以銘其壙者以爲請十二年八月丙辰始克文之而壙闕不可銘乃刻記其墓上君諱昂字顥叟曾祖某祖某世籍鴈池考某愛樂清之柳市徙居之館頭樂清之間路不埃壕無梁行旅無舍蓋柳市稍有聚落大姓而君以賢聞君和厚平恕以卑遜韜其材力時發於事之難者壯勇敢決己力強黨破散陰類消伏衆皆推君爲能問學知大義所止不爲異人之行人亦莫有指其過温之士幾萬人其解選拘於舊額最號狹少以幸爲得爾如君之賢旣遺落不偶而君無暇與新進爭所知退而教子讀書擇古人之義耽玩傳寫申論反覆陶然有以自樂初君之子與其鄉黨周旋通於令長以任利害

之政凶饑有調征斂有損施設惠愛尙多可紀而余獨以爲君旣不幸不得見其大者於世用則其小者豈必以此求知於衆人故余亦存其大略而已矣夫  
人翁氏七男子履常履端履冰履道履遠履大履言一壻張自得二女笄未適  
也孫曰安娘履常爲迪功郎新建昌軍學教授與余同高氏壻云

資政殿學士參政樞密楊公墓誌銘

唐靜恭坊楊氏尤貴盛入本朝至公七世皆有顯人繇公而上北海主簿符都  
水使者曼駕部郎中宿皆以公贈東宮師保公諱愿字原仲宣和末自太學錄  
上書陳九事女真聞其名聘之北行匿民間上書執政請迎復元祐皇后奔濟  
州勸進辟元帥府屬高宗卽位授修職郎仍學錄議將遷金陵復上書幸揚州  
御營使辟機宜文字丞新昌縣越州辟觀察判官參政秦檜薦授樞密院編修  
官中紹興二字進士第遷計議官召試館職議者謂公因元帥府得仕則右選  
也當罷宰相趙鼎明不然乃已主管崇道觀吳郡陳夫人喪免除祕書郎議者  
猶在通判明州潘良貴素善公事常咨而後行公亦爲之盡除祕書丞監察御

史司封右司員外郎起居舍人兼中書舍人初修玉牒以選命公除中書舍人  
 賀金人正旦於是始用年號兼侍講給事中直學士院接伴虜使完顏暈於是  
 始揖暈於淮中流舟行以賓主爲次御筵口宣設案拜舞南人驟覩曠禮泣下  
 沾襟除御史中丞未幾除端明殿學士簽書樞密院事兼權參知政事時紹興  
 十四年十二月也十五年十月御史論韓公裔語微及公卽乞疏五上以端明  
 提舉太平觀知宣州玉牒書成遷資政殿學士知建康府守郡四年政以簡治  
 以靜不數令不興役刑罰罕用穀麥滋熟二十二年十一月二十八日薨於州  
 年五十二配曰永陽夫人王氏公世家楚吳郡之歿也公葬之於越二十四年  
 三月七日子右奉議郎新江州通判祐遂葬公會稽縣五雲鄉之何山孫若干  
 某官孫女若干壻某官公孝友賓睦大祀恩徧任兄弟及妹之子敬賢與善後  
 進單文獨藝禮待必均始在太學年尙少文甚敏行與文稱恂達而矩嚴重而  
 通祭酒楊時印信諸生二千人皆伏受令學禁齋肅不敢踰越也論王安石學  
 術之禍精於元祐者不能過也分別徐處仁吳敏李綱功罪無不曲當也歷指



宣和致亂靖康弊風窮大極小無不激烈也又曰謀以活國者國常存而身隨之安謀以活身者國常亡而身隨之危今一舉而遷金陵求活身也非活國也虜既滅吾國矣陛下將活其國以自存乎將活其身而國終於亡乎今盜賊滿天下隨而爲兵亦滿天下而天子侍衛乃不過三千非滿二萬安能主令也蕭山戶萬九千其九家自爲守萬取千人爲兵方李抱真則損其十方李德裕則加其百通之天下不勝兵矣夫酒稅房廊頭子雜名之錢皆漕計也增取其三別屬經制漕計甚緩經制愈急善良窮感姦猾怨憤倉猝之變何必唐建中哉前後累數萬言文武大略經緯條理遠有賈陸遺思近有歐蘇新意時材不能及也宰相以爲州縣常人耳不顧省檜獨首薦登於朝及趙張更迭重任士徒步拔引翕忽鼎貴然亦不能用檜卒用之起祕書丞數年預政嗚呼公之不幸檜之幸也在易之頤所以爲頤者初也賢也而以自養爲吉四者頤之顛也而以所養爲吉夫養必以正而不以應古人之戒深矣檜能用公而公爲檜用此明於頤者所以爲公惜也雖然余有疑焉檜歸自虜人皆曰請立趙宗也許還

母后也又曰收悍將也總利柄也天下望檜與趙張等而或以爲過之士游其門與趙張等而未有以爲不及也張丞相罷高宗問代卿者檜乎張不對固問則曰近與共事方覺其闇上曰然則趙鼎也張惘然不知所出而秦與趙張之憾不可解矣夫同在廊廟徒晚覺於十年之後公疎遠也而責其蚤覺於十年之先乎豈公自以爲上九之由頤而明於頤者特未之及耶公後六十餘年窳持其家傳泣曰善實者有徵也故述有據世異者無黨也故筆無私子奚捨諸公嘗賦東山三疊其詞曰雲遡風而上征兮鳥擇木而高翔然則公擇之者歟故併次以爲銘若夫陽爲噴飯玩也公不爲玩也留其表弟厚也公爲厚也其差誤鄙淺不足復辨也銘曰

東山之久兮孰爲征東山之高兮誰實登一周孔之譽慕兮百共鯨之怨憎失類而行道遠且艱人有其寶不如何山瞻彼何山言樹之麓豹文而隱龜壽而依瞻彼何山言息其巔星不離經水皆滌源繡裳蕭蕭白壁沉沉揭茲墓門五雲之深嘉定十四年閏十二月□日

水心文集卷之二十三